

Varu poia To Yesu Krisi To Markus Imbooda Mak—Mark

*Yoan ngeu rughuzaanja igharaat ataam pa Yesu
Krisi*

(Mt 3:1-12; Lu 3:1-18; Yo 1:19-28)

¹⁻² Nene varu poia to Yesu Krisi, ye Maaron Natu. Saveeja to imuun, nene vene: Uraat toni imundig itaghon Maaron aliña to propet Isaia ivotia ve timbooda ila rau. Saveeñ tovene:

“Uloon. You pale nambaan mbesoonja tiou imuun payom.

Ye pale ivotia aliñag pa tamtoghon ve igharaat ataam payom. *Mal 3:1; Mt 11:10; Lu 7:27*

³ Ngeu eez imboboob izi ndug balim ighaze:

‘Agharaat ataam pa Ngeu Tiina!

Apasalungan ataam pani le denja moghon.” ’

Is 57:14; Yo 1:23

⁴ Saveeñ tonene ighur anonja iza to Yoan ngeu rughuzaanja. Pasa, ye ila ivot ndug balim, ve ivovotia Maaron aliña pa tamtoghon ighaze tipul ngar todi samsamia, ve titoor ngar todi imuul ila pa Maaron, ve tigham ya. Leso Maaron ireu sosor todi. *Mban 13:24, 19:4*

⁵ Ival tiina to taan suruvu to Yudea, yesna Yerusalemisa tisob tiketkeet tilala toni izi ya Yordan paña, ve tivovotia sosor todi ila toni, ve ye irurughuuz di tonowe.

⁶ Yoan indudi pa uli to tigharaata pa kamel oro, ve ipus ngali pa puus to tigharaata pa ngai uli.*
Ve ighanghan isis, ve ighunghun bagil suru. *2King 1:8*

⁷ Ye ivovotia saveen pa tamtothon tovene ighaze: “Ngeu eez pale inim muri payou. Ye tapiri tiina. Ilib payou kat. You naghita taug naraua maau kat. Uraat sorok inimale naput agheg pani ve napool waar to duduunja to aghe, nene paam, you poiag irau to naghama pani ne maau. *Mbanj 13:25*

⁸ You narughuuz gham pa ya moghon. Eemoghon ye pale ighama Avuvu Patabuan payam.” *Mbanj 2:4*

Yesu ighama ya

(Mt 3:13-17; Lu 3:21-22)

⁹ Sawa tonenen, Yesu ipul ndug Nasaret to Galilaia, ve ilaagh ila ivot to Yoan izi ya Yordan, ve Yoan irughuuz tonowe. ¹⁰ Yesu ipul ya ve iza, ve sawa tonenen, mata iza le ighita sambam ikaak, ve Maaron Avuvu izi inim inimale man mbaluuz, ve izala pogho. ¹¹ Ghorosaveen ineep sambam ve izi inim ighaze: “You natug ee moghon yom. You lolog payom, ve yom ughama ghou lolog poia kat.” *Mbo 2:7; Is 42:1; Mt 12:18; Mk 9:7*

Sadan itoov Yesu

(Mt 4:1-11; Lu 4:1-13)

¹² Yesu ighama ya le isob, ve rikia moghon Maaron Avuvu ipamundigini ve ipul ya Yordan, ve ila ivot ndug balim. ¹³ Ye ineep tonowe toman mbeb to su irau mbonj tamoot ru. Sawa tonenen,

* **1:6:** Yoan indudi inimale muun propet Ila indudi. Ngar toni tonene inim ghilaloon pani ighaze ye pale ighama uraat pida inimale propet Ila.

Sadan itovtoova. Eemoghon yes anjela tinepneep tomani ve tiuluuli.† *Mbnp 2:19–3:7; Mbo 91:11+; 1Kor 15:47*

Yesu ipamundigin uraat toni izi Galilaia

(Mt 4:12-17; Lu 4:14-15)

¹⁴ Yoan ighamgham uraat toni ila, le tikisi ve tighuri iloonj ila ruum to yabyabuunj. Ghoru Yesu ila ivot taan suruvu to Galilaia muul, ve ipamundigin uraat toni to votiaan varu poia to Maaron.

¹⁵ Ye isavsaav pa tamtoghon ighaze: “Aloonj! Sawa to Maaron ipatoonj pooz toni ivot ighazonj, nene inim igharau wa. Apul njar tiam samsamia, ve atoor njar tiam imuul ila pa Maaron, ve aghur ila varu poia!” *Mt 3:2; Ga 4:4*

Yesu ipoi tamtoghon paan tinim taghoniija toni

(Mt 4:18-22; Lu 5:1-11)

¹⁶ Sawa eez, Yesu ilaghlaagh taghon naari to ya naliu Galilaia, ve ighita ndiran ru to ghamuunj iigh tiwaswaas. Eez iza Simon, ve ite iza Andreas. Ye Simon tazi. ¹⁷ Yesu ighita di, ve isaav ila padi ighaze: “Ai, yamru anim ataghon ghou. You pale napatooj gham pa ataam to ghamuunj tamtoghon.” ¹⁸ Rikia moghon yesuru tipul malum todi tizi tineep, ve titaghon Yesu ve yesna tila.

¹⁹ Tilaagh tila ris, ve Yesu ighita Zebedi ndinatu ru, Yakobus ve Yoan, tinepneep izala waan pogho ve tiyaim malum todi. ²⁰ Yesu rikia moghon isaav ila padi ighaze tinim titaghoni. Tovenen yesuru paam tipul tamandi toman uraata toni tineep

† **1:13:** Yesu ineep izi ndug balim ve Ngeu Samia itovtoova inimale muun Adam ineep izi uum Eden ve Sadan itoova. Eemoghon Yesu itap ve igham sosor eta maau.

izala waan pogho, ve tila titaghon Yesu ve yesna tila.

Yesu indiidir avuvu samia pa ngeu eez

(Lu 4:31-37)

²¹ Yesu toman taghoniina toni tila tivot ndug Kapernaum, ve tineep tonowe le umbom patabuan ivot. Ghoru Yesu iloon ila rumai, ve ipatoot di pa Maaron aliina. ²² Yes tiloon saveen toni le runadi iza pa ngar toni. Pasa, ye ipatoot tamtoghon inimale ndiran ngara pida to tutuun maau. Saveen toni toman tapiri. Ye isavsav inimale tamtoghon to le iza pa uraat toni. *Mt 7:28+*

²³ Sawa tonenen, ngeu eez ineep toman di ila rumai lolo. Ye, avuvu samia izeeva. Tovenen imboob aliina tiina ighaze: ²⁴ “Aii, Yesu to Nasaret, unum sualen pasa? Yei nimbaan payom? Ma unum ughaze uwaghamun ghei? You nawatag ghom wa. Yom ngeu patabuan to Maaron.” *Mt 25:41; Mk 15:39; Yems 2:19*

²⁵ Eemoghon Yesu iyaana ighaze: “Ai, yom neneenam. Upuli ve ughau ula!” ²⁶ Ye isaav tovene, ve avuvu samia iwatokin ngeu tonenen, iyak samia, ve ipuli ve ila. *Mk 9:26*

²⁷ Yes to tighita mbbeb gharatoonja tonenen, tisob runadi iza pa Maaron tapiri, ve tiwasavon di tighaze: “Wai, nene sa mbbeb tovene? Ngeu tonene ipatoot tamtoghon pa ngar paghu. Ve aghita. Avuvu samsamiadi paam tineep ila samba. Pasa, sawa to isaav ariana padi, yes tiloon aliina ve tighau tila. Ngeu tonene, ye le iza ve tapiri.”

²⁸ Pughu tonenen to Yesu varu ilaan rikia moghon le irau taan suruvu to Galilaia.

*Yesu igharaat moroghoon to Petrus rawa liva
(Mt 8:14-15; Lu 4:38-39)*

²⁹ Yesu ipul rumai tonenen, ve yesja Yakobus ve Yoan malmalidi tila pa Petrus yesuru Andreas ruum todi. ³⁰ Tiloon tila ruum lolo, ve tipaes pa Yesu tighaze Simon rawa liva imoroon le tini ituntun ve ighengheen we. ³¹ Tovenen Yesu ila toni, ikis olman tidi nima, ve ipamundigini iza iyoon, ve moroghoon toni isob. Ghoru olman tidi ila igharaat adi aniiñ.

*Yesu igharaat moroghoon a katindi
(Mt 8:16-17; Lu 4:40-41)*

³² Tinepneep le rabrab izi ve ndag izila, ghoru tamtoghon tiyou nditadi tisob to timoroon, ma avuvu samsamiadi tizeev di ne tila to Yesu, leso iuul di. ³³ Ndug tonowen tamtoghona tisob tila tirou izi ataam avo to ruum to Yesu ineep pani.

³⁴ Yesu igharaat tamtoghon katindi pa moroghoon todi naol naol, ve indiir avuvu samsamiadi naol padi paam. Avuvu samsamiadi tonowen tiwatagi wa. Tovenen ye ingalsekin di ighaze ti-savia saveej eta malep. *Mk 1:24,*

3:11+

*Yesu igham uraat izi paanu pida to Galilaia
(Lu 4:42-44)*

³⁵ Mbonjmaagh ndoromaanja kat, ve Yesu imundig ve ipul paanu, ve ilaagh ila pa ndug balim eez. Ghoru engeni ineep tonowe, ve isunj. *Mbo 5:3; Mt 14:23; Mk 6:46*

³⁶ Eemoghon Simon toman ndita pida tila tikaala. ³⁷ Tikaala tila le tindeenja, ve tipaes pani tighaze: “Ival tiina tikalkaal ghom we.” ³⁸ Yesu ipamuul

aliñadi ighaze: “Iit irau tala pa paanu pida to tatanjan ne. Leso navotia saveeñ padi paam. Pasa, you nanim pa uraat tovene.” ³⁹ Tauto Yesu ilaagh irau ndug ndug to Galilaia, ve ivovotia Maaron aliña iloon ila rumai todi, ve indirndiir avuvu samsamiadi tighau pa tamtoghon.

Yesu igharaat ñgeu eez to kolekole (o sik lepra) ighami

(Mt 8:1-4; Lu 5:12-16)

⁴⁰ Ñgeu eez, kolekole ighami. †

Ye inarua Yesu ila, iput aghe izi Yesu nagho, ve itañ rorani ighaze: “Ighaze lolom pa uul ghou, yom irau ugharaat ghou tinig poia, ve ugham ghou nangalañ ila Maaron mata.”

⁴¹ Yesu lolo isamini, tovenen nima ila ikisi, ve isaav pani ighaze: “Poia, you pale nauul ghom. Yo, tinim poia, ve unğalañ!” ⁴² Ye isaav tovene, ve rikia moghon kolekole ighau pa ñgeu tonenen ve tini poia. ⁴³⁻⁴⁴ Ghoru Yesu imbaaña ila, ve isaav ariaña pani ighaze: “Uloñ, aazne tinim poia wa. Eemoghon usavia mbeb tonene varu pa tamtoghon eta malep. Malmalim ula, ve up-atoñ taum pa ñgeu eta to watoonrau, ve ugham watoonrau itaghon tutuun to Mose isavia. Leso up-aghazonan taum pa tamtoghon, ve tiwatag tighaze tinim poia, ve unğalañ ila Maaron mata wa.” *Wkp 14:1+*

⁴⁵ Eemoghon ñgeu tonenen itaghon Yesu aliña maau. Ye ila ve isavia mbeb to ivot pani ne varu pa

† **1:40:** Ighaze kolekole igham tamtoghon eta, nene patañani tiina kat. Moroghoon toni ipoona pa ndita ve Maaron paam. Ye irau igharau tamtoghon eta maau, ve irau iloon ila Rumai Tiina pa sunuun maau.

yes ival. Tovenen Yesu irau ilaagh ila tamtoghon matadi muul maau, ve iloonj ila paanu eta maau. Ineep saguan izi ndug balim moghon. Eemoghon ndug ndug tilala toni.

2

*Yesu igharaat ngeu narape eez ve ireu sosor toni
(Mt 9:1-8; Lu 5:17-26)*

¹ Mboj pida inim ila, ghoru Yesu imuul ila pa Kapernaum, ndug to ye inepneep pani. Tamtoghon tiloonj Yesu varu tighaze ye imuul ila ineep izi ruum toni, ²⁻³ tovenen ival tiina tila ve tipavonin ruum toni le ivon kat. Ataam pughu paam, tipoona le soso maau. Yesu ivovotia Maaron aliŋa padi, ve ndiran paanj timbaad ngeu narape eez tinim tighaze Yesu iuuli. Ngeu tonowen aghe imaat. Irau laghoonj maau. ⁴ Ndiran paanj tonenen titoova pa tiloonj tila tigharau Yesu. Eemoghon tiraua maau. Pasa, ival tiina tipoon di. Tovenen tigham narape tonenen, ve titaghon ndeet tizala pa ruum pogho. Ghoru tipas atob pida ighau, ve titugi toman moogh to ye igheen izala ne, le izi Yesu nagho. ⁵ Yesu ighita ndiran tonenen ghurla todi iyaryaanj kat. Tovenen isaav pa narape tonenen ighaze: “Ngeu tiou, sosor tiom, you nareua wa.” *Lu 7:48*

⁶ Ndiran ngara pida to tutuunj tineep toman di paam. Yes tiloonj Yesu saveenj toni tonene, ve tigham ngar naol ila lolodi tighaze: ⁷ “Wai, pughu vena to ngeu tonene isavia saveenj tovene? Ye iveleg Maaron! Tamtoghon eta irau ireu sosor maau. Maaron moghon, ghoru ireu sosor.” *Mbo 32:5; Is 43:25; 1Yo 1:9*

⁸ Yesu rikia moghon ighilaal ngar todi ila lolo. Tovenen ighason di ighaze: ⁹⁻¹⁰ “Pughu vena to yam agham ngar naol ila lolomim? Sa saveen to rauraua pa you nasavia, leso yam aghur ila? Nasaav pa narape tonene naghaze: ‘Sosor tiom, you nareua wa,’ ma naghaze: ‘Yom umundig, ugham moogh tiom, ve ulaagh?’ Eemoghon you naghaze yam awatag kat tovene: Tamtoghon Natu, ye iza pa ireu sosor to tamtoghon izi taan.” Ghoru isaav pa narape tonenen ighaze: ¹¹ “You nasaav payom: Umundig, ugham moogh tiom, ve umuul ula pa ruum.” *Yo 5:8; Mbanj 3:6*

¹² Ye isaav tovene, ve ival tiina tonowen tisob timbatut narape tonenen, ve rikia moghon ye imundig iyoon, igham moogh toni, ve ivot ila. Yes tighita mbef gharatoonja tonenen, ve tisob runjadi iza, ve tipait Maaron iza pa tapiri ve poia toni tighaze: “Wai, muun ve inim, iit taghita mbef eta tovene maau.” *Mt 9:33*

*Yesu ipoi Levi inim taghoniija toni
(Mt 9:9-13; Lu 5:27-32)*

¹³ Yesu ipul paanu tonenen, ve izila naari to ya Galilaia muul ve ilaghlaagh. Ival tiina tila toni, ve ye ipatoot di pa Maaron aliija. ¹⁴ Ghoru ilaagh muul ila, ve ighita ngeu eez to youn takes inepneep ila ina to uraat, iza Levi. Ye Alpeus natu. Yesu isaav pani ighaze: “Yom unum utaghon ghou.” Tovenen Levi imundig, ve itaghoni ve yesja tila.

¹⁵ Muri ghoru, Levi igham ghanghaniin izi ruum toni. Yesu toman taghoniija toni tinim tineep toman di, ve yesja tilup di pa ghanghaniin. Sawa tonenen, Levi ndita katindi to youn takes, toman tamtoghon naol to ghamuun sosor tinim tineep

toman di paam ve yesna tilup di pa ghanghaniin. Pasa, tamtoghon tovene, katindi titaghon Yesu. ¹⁶ Ndiran tutuuna pida to ledi ngar tintina pa tutuun, tighita Yesu toman ndiran to ghamuun sosor ve yes to youn takes tilup di pa ghanghaniin, ve tighason taghoniina to Yesu tighaze: “Wai, vena to tiina tiam yesna ndiran to youn takes ve yes to ghamuun sosor tilup di pa ghanghaniin?” *Mt 11:19; Lu 15:1+*

¹⁷ Yesu iloon saveen todi, ve isaav padi ighaze: “Yes to tinidi popoia ne, uraata to moroghoon le uraat padi maau. Yes moroghoona moghon, ghero ye le uraat padi. You tovene paam. Nanim pa poin tamtoghon denjadi maau. Nanim pa poin yes to ghamuun sosor.”

Ghasoniin pa ngar to ngunuun tauud pa ghaniin aniiin

(Mt 9:14-15; Lu 5:33-35)

¹⁸ Taghoniina to Yoan ngeu rughuzaana, ve taghoniina to yes ndiran tutuuna, sawa naol tingun taudi pa ghaniin aniiin itaghon sunuun ngara. Tovenen sawa eez, ndiran pida tinjara Yesu tila, ve tighasoni tighaze: “Taghoniina to Yoan ve taghoniina to ndiran tutuuna, sawa naol tingun taudi pa ghaniin aniiin. Pughu vena to taghoniina tiom titaghon ngar tovene maau?”

¹⁹ Yesu ipamuul ghasoniin todi tovene: “Ighaze vaiuun paghu eta toman ndita tilup di pa ghanghaniin to vaiuun toni, pale ndita lolodi ipatanan ve tingun taudi pa ghaniin aniiin? Maau. Pasa, itadi ite to ivai paghu, ye inepneep toman di.

²⁰ Emoghon muri, sawa eta pale ivot, ghero tikis

vaiuun paghu tonenen, ve tighami ipul ndita. Sawa tonenen, ndita pale lolodi ipatajan, ve tingun taudi pa ghaniin aniiñ.”

Ataam mungina irau ilup toman ataam paghu to Yesu maau

(Mt 9:16-17; Lu 5:36-39)

²¹ Yesu isavia saveen palelaan ite padi ighaze: “Uli mungina to imarepreep, irau tisai uli paghu suruvu izala pogho pa ipoona ne maau. Pasa, sawa to timen uli tonowen, nene pale uli paghu ighoon uli mungina, ve imarepreep le isami kat.

²² Vaen tovene paam. Irau tiliñ vaen paghu izila patu mungina to tigharaata pa mekmek uli ne maau. Pasa, vaen paghu pale isar, ve igham patu mungina diñia ve ivavaal. Ghoru vaen imaliñ, ve patu paam isami. Tovenen vaen paghu izila patudi papaghu, ghoru poia.” *Mban 15:1-29; Ro 10:4; Hib 8:13*

Tamtoghon Natu ingin umbom patabuan to Maaron

(Mt 12:1-8; Lu 6:1-5)

²³ Umbom patabuan eez, Yesu toman taghoniinja toni tilaghaagh ila uum to wit lolodi, ve taghoniinja toni tingoor wit anonja pida, ve tighan.

Lo 23:25

²⁴ Tovenen ndiran tutuunja pida to tineep tigharau di, tighason Yesu tighaze: “Ai, ughita! Pughu vena to taghoniinja tiom tigham ngar tonenen? Aazne, nene sawa to uraat maau. Nene umbom patabuan to Maaron. Ngar to tighami, nene iyel pa tutuun to umbom patabuan.” *Igham 20:10, 34:21*

²⁵⁻²⁶ Yesu isaav padi ighaze: “Kamos to isavia sawa to kinik David yesña ndita pida timbool pa

aniin ve pitool di, yam awaata rita, ma maau? Kamos tonenen isaav tovene: Sawa to Abiata ye daba to watoonrau, David iloon ila mbeez (o haus sel) patabuan to Maaron, ve igham mberet patabuan to tighuri ila Maaron nagho. Mberet tonowen tutuuna tovene: Ival tiina irau tighan maau. Yes ndiran to watoonrau moghon, ghoru tighani. Eemoghon David igham mberet tonenen ve ighani, ve irei pida pa tamtoghon toni ve tighan paam.”

Wkp 24:5+; 1Sam 21:4+

²⁷ Ghoru Yesu ipasob saveen toni ighaze: “Maaron ighur umbom patabuan pa iuul tamtoghon. Ighur tamtoghon pa tinim mbesoona pa umbom patabuan ne maau.

Igham 23:12

²⁸ Tovenen Tamtoghon Natu, ye Tiina to ingin umbom patabuan to Maaron.”

Kol 2:16-17

3

*Yesu igharaat ngeu eez to nima imaat
(Mt 12:9-14; Lu 6:6-11)*

¹ Tineep le umbom patabuan ite ivot, ghoru Yesu iloon ila rumai eez. Ve ngeu eez inepneep toman di. Nima eez imaat. ² Ndiran tutuuna pida tinepneep toman di paam. Yes tighaze tipayoon Yesu pa savsaveen. Tovenen timbatuti tighaze tighita: Pale igharaat ngeu tonenen ila sawa to umbom patabuan, ma maau? ³ Yesu isaav pa ngeu to nima imaat ighaze: “Unum uyoon sualen.”

⁴ Ghoru ighason ndiran tutuuna tonenen ighaze: “Laak, ngar sine to yam aghita aghaze denja itaghon tutuun to umbom patabuan? Tauul tamtoghon ve tagham poian di, ma tagham samin di?”

Tagham mulin di pa patanani todi, ma tarab di timaat?” Yesu isavia saveen tonenen ve neneenadi moghon. Irau tipamuul aliña maau. *Lu 14:3*

⁵ Tovenen Yesu ate malmal ve mata ibelbel padi. Pasa, ngar todi iyaryaan kat, ve lolodi isamin ngeu tonenen rita maau. Eemoghon lolo ipatanan padi paam. Ghorosaa pa ngeu to nima imaata ne ighaze: “Upaat nimam.” Tovenen ngeu tonenen ipaat nima le poia muul. ⁶ Tauto ndiran tutuunja to tineep toman di, timundig tivot tila pumuri, ve yesna ndiran pida to tiluplup toman Erod, tilup di ve tikaal ataam pa tirab Yesu imaata. *Mt 22:15+; Yo 5:16*

*Ival tiina titaghon Yesu
(Mt 4:24-25, 12:15-16; Lu 6:17-19)*

⁷ Yesu toman taghoniinja toni tipul ndug tonowen, ve tizila muul pa ya naliu Galilaia. Ve ival tiina kat to Galilaia titaghon di ve yesna tila. ⁸ Ve yes moghon maau. Tamtoghon katindi to Yudea, Yerusalem, ve Idumea, toman tamtoghon naol to ndug pida to tineep ila ya Yordan pana ite, tila toman di. Ve taan suruvu to ndug Tiro ve Sidon tamtoghona paam, tiloon Yesu varu pa mbeb naol to ye ighamgham di ne. Tovenen tisob tila tighaze tighita. ⁹ Ival tiina tonenen tila tiluvut Yesu. Tovenen ye isaav pa taghoniinja toni tigham waan eta inim isaan pani. Ighaze tamtoghon tigrinji, ghorosaa iza waan ve ila ipot sagan. ¹⁰ Pasa, Yesu igharaat moroghoonja katindi le tinidi popoia. Tovenen ival tisob to timoroon, tiwandiron di tighaze le tikisi.

¹¹ Yes to avuvu samsamiadi tizeev di, sawa isob to tighita Yesu, titaptap tizi taan ila ye nagho, ve timboboob alinjadi tiina tighaze: “Yom Maaron Natu!” *Mk 1:24,34; Lu 4:41; Mbanj 19:15*

¹² Eemoghon Yesu iyaan di, ve ingalsekin di ariana ighaze tivotia iza ighazonj malep.

Yesu ighur tamtoghon saangul ve ru tinim taghoniija toni

(Mt 10:1-4; Lu 6:12-16)

¹³ Muri ghero, Yesu izala pa lolooz eez, ve ipoi tamtoghon pida to ye lolo padi ne, tinim toni. ¹⁴⁻¹⁵ Ve ighur tamtoghon saangul ve ru tinim taghoniija toni. Leso tineep tomani, ve muri pale imbaan di tila pa tivotia varu poia. Ve irei tapiri irau di, ve ighur avuvu samsamiadi tisob tineep ila sambadi. Leso tindiir di tighau.

¹⁶ Ndiran saangul ve ru tonowen, izadi tovene: Simon (ye, Yesu iwaat iza ite ighaze Petrus), ¹⁷ ve Zebedi ndinatu ru, Yakobus yesuru tazi Yoan. (Ndiran ru tonene, Yesu iwaat di ighaze ‘Boanerges.’ Izadi tonene, pughu tovene: ‘Lalaav ndinatu.’) *Lu 9:54*

¹⁸ Ve Andreas, Pilip, Batoromai, Matayu, Tomas, Yakobus ite to Alpai natu, Tadeus, Simon ite to iyoon toman yes Selot,*

¹⁹ ve Yudas Iskariot to muri ighur Yesu ila koia nimadi.

* **3:18:** Selot, nene lupuunj eez to yes Yuda to tighaze tizurun gavman to Rom tighau.

Yesu koia tighaze ye igham uraat toman Sadan tapiri

(Mt 12:22-32; Lu 11:14-23, 12:10)

²⁰ Yesu toman taghoniija toni timuul tila pa ruum, ve ival tiina tinim tilup toman di muul. Tovenen ledi sawa rita to ghanghaniij maau. *Mk 6:31*

²¹ Yesu sinj toni pida tiloonj varu pa mbep naol to ye ighamgham di, ve tila tighaze tikisi. Pasa, tighaze ngar toni iwaghamgham. *Yo 7:5, 10:20*

²² Ndiran ngara pida to tutuunj tineep Yerusalem ve tinim, ve tingal saveenj pani tighaze: “Belsebul, daba to avuvu samsamiadi, izeeva ve ipaloti. Tauto ye le tapiri pa indiid avuvu samsamiadi tighau.” *Mt 9:34*

²³ Tovenen Yesu ipoi di tinim, ve isavia saveenj palelaan tonene padi ighaze: “Vena, pale Sadan ighur koi pa tau ndita, ve indiid di tighau? Maau.

²⁴ Ighaze kinik eta toman tamtoghon toni tiwaghurun koi pa taudi, ve tivalag di tineep ledi ledi, yes irau tiyoon ariana maau. ²⁵ Ve ruum paam. Ighaze tamtoghona tiwaghurun koi pa taudi, ve tivalag di tineep ledi ledi, yes irau tiyoon ariana maau. ²⁶ Sadan tovene paam. Ighaze imundig ve igham malmal pa tau ndita, ma tamtoghon toni tiwaghurun koi pa taudi ve tiwavalagun di, nene irau iyoon iyaryaan muul ne maau. Tapiri ighaze isob.

²⁷ “Tamtoghon eta irau iloonj ila ruum to ngeu ariana eta ve iyou mbep toni sorok ne maau. Ye irau itatan ngeu ariana tonenen tapiri ve ikau pa ravraav le isob, ghoru iyou mbep tisob to tineep

iloonj ila ruum toni lolo. *Kol 2:15; 1Yo 3:8, 4:4; Syg 20:2*

*Sosor to tamtoghon tigham pa Avuvu Patabuan
(Mt 12:31-37; Lu 12:10)*

²⁸ Onoon kat, you nasaav payam: Sosor isob to tamtoghon, ve saveenj samsamia naol to tipiyaava pa Maaron, nene Maaron irau ireua padi. ²⁹ Eemoghon ighaze ngeu eta ipiyaav saveenj samia injarua Avuvu Patabuan ve iveleg uraat toni, sosor tovene, Maaron irau ireua maau. Maau kat. Pale ineep le alok.” *Mt 12:31+; Lu 12:10; Hib*

³⁰ Yesu isavia saveenj tonenen padi pasa, yes tighaze avuvu samia izeeva.

*Yesu tina ve nditazi
(Mt 12:46-50; Lu 8:19-21)*

³¹ Sawa tonenen, Yesu tina ve nditazi tinim tivot. Yes tiyoon pumuri, ve timbaan pa Yesu tighaze ivot ila todi. ³² Sawa tonenen, ival tiina tirou lututin Yesu. Yes tisaav pani tighaze: “Ou, tinam ve nditazim tinim tiyondyood pumuri we. Tighaze tighita ghom.”

³³ Yesu ipamuul aliñadi ighaze: “Tinañ sei, ve nditazig sei masin?” ³⁴ Ghoru mata ila pa ival tiina to tiluvuti, ve isaav padi ighaze: “Nene you nditinañ ve nditazig. ³⁵ Pasa, sei to ighaze itaghon Maaron lolo, nene inim you tazig, livug, ve tinañ.” *Ro 8:29; Hib 2:11+*

4

*Saveenj palelaan to suruvuunj uuv
(Mt 13:1-9; Lu 8:4-8)*

¹ Yesu ila ivot ya naliu dige, ve ipamundi-gin uraat toni muul to patoŋaŋ tamtoghon pa Maaron aliŋa. Sawa tonenen, ival tiina kat tila tiluvuti tighaze tilooŋ saveeŋ toni. Tovenen ye iza waŋ eez, ve tipanduura ivot ila ris. Ghoru mbole izi, ve ivotia Maaron aliŋa padi. Ve ival tiina tonowen tineep izi naari, ve tighurghur taliŋadi pa saveeŋ toni. ² Yesu ipatoot di pa mbeb naol ila saveeŋ palelaŋ. Ye isaav padi ighaze:

³ “Alooŋ. Sawa eez, ŋgeu eez igham wit uve, ve ila uum toni ighaze isuruuv di. ⁴ Sawa to ye isusuruuv uuv tonowen, pida titaptap tizi ataam. Tovenen man tiroov tila ve tighan suvun di. ⁵ Ve pida titaptap izi ndug to boŋar tiina ineep izila sila, ve taan ris moghon ineep izala pogho. Tauto titub rikia tiza. ⁶ Eemoghon sawa to ndag ighaaz ve taan ituntun, wit tonowen rauadi timalai ve timatmaat. Pasa, wariadi tizila kat maau. ⁷ Ve uuv pida titaptap ila waar mata mata lolodi. Tovenen waar tonowen titub toman wit tiza, ve tiwakaun di le anoŋadi maau.

⁸ “Eemoghon uuv pida titap tizala taan poia. Tovenen tipaar tiza le titub pooi, ve anoŋadi katindi. Pida anoŋadi irau tamoot ee saŋgul (30), pida anoŋadi irau tamoot tol (60), ve pida anoŋadi irau tamoot liim (100).”

⁹ Yesu isavia saveeŋ palelaŋ tonenen le isob, ghoru ipariaaŋa ighaze: “Tamtoghon to ighaze le taliŋa, ye irau ilooŋ saveeŋ tonene, ve igham ŋgar pani pooi!”

*Pughu to Yesu isavsaav ila saveeŋ palelaŋ
(Mt 13:10-17; Lu 8:9-10)*

¹⁰ Ival tiina tonenen tipul di ve tila, ve muri ghoru, Yesu toman taghoniija toni saangul ve ru ve ndiran pida, yes moghon tineep. Yes tighasoni pa saveen palelaan toni pughu, ¹¹ ve Yesu isaav padi ighaze: “Pooz to Maaron, nene ngara yongaan. Eemoghon yam, Maaron igham poian gham ve ipaghazonan gham pa ngar tonenen. Ve yes to tineep ila pooz toni lolo maau, tilonloon mos ila saveen palelaan moghon. [Pasa, lolodi ivool wa.]

¹² Tauto pale matadi tighita mbeb, eemoghon irau tighilaal pughu maau.

Ve talinadi tiloon saveen, eemoghon irau tigham ngar pani maau.

Ve inimale tighilaal mbeb pughu ve tigham ngar pani, tone titoor ngar todi, ve Maaron ireu sosor todi.” *Is 6:9+; Yo 12:40; Mbanj 28:26+; Ro 11:8*

*Saveen palelaan to suruvuun uuv pughu
(Mt 13:18-23; Lu 8:11-15)*

¹³ Yesu isaav padi muul tovene: “Ighaze aghazon pa saveen palelaan tonene pughu maau, nene pale awatag saveen palelaan pida pughudi vena? ¹⁴ Wit uve to ngeu tonenen isuruuv di, nene iza to Maaron saveen toni. *1Pe 1:23*

¹⁵ “Uuv pida to titaptap tizi ataam, nene iza to tamtoghon to tiloon Maaron aliija, eemoghon rikia moghon Sadan ila ve isad saveen tonowen ighau pa lolodi.

¹⁶ “Ve uuv pida to titaptap izi ndug to yaam tiina ineep izila sila ve taan ris moghon ineep izala pogho, nene iza to tamtoghon to tiloon Maaron aliija, ve rikia moghon tighami toman lolodi poia

kat. ¹⁷ Eemoghon saveeŋ tonowen ineep tunja ila lolodi maau. Yes tinimale aniiŋ to waria izila kat taan lolo maau. Tovenen tiyoon tunja ris, ve ighaze tamtoghon tigham samin di, ma patañani ite paam ivot padi pasa, titaghon Maaron aliŋa, nene rikia moghon titap ve tighur muridi pa Maaron.

¹⁸ “Ve uuv pida to titaptap ila waar mata mata lolodi, nene iza to tamtoghon to tilooŋ saveeŋ to Maaron. ¹⁹ Eemoghon patañani naol to taan, toman mbaliŋ ve mbeb popoiadi naol to taan to tamtoghon lolodi igham pani, nene ighamun nŋar todi. Tovenen saveeŋ to ineep ila lolodi ne, ighur anoŋa eta ivot maau. *Mt 19:23+; Lu 12:15; 1Tim 6:9,17; 1Yo 2:15+*

²⁰ “Ve uuv pida to nŋeu tonenen isuruuv di ila taan poia, nene iza to yes to tilooŋ saveeŋ to Maaron, ve tighami toman lolodi poia. Tovenen ghurla todi ighur anoŋa popoia katindi. Pida, anoŋadi tivot irau tamoot ee saanŋul (30), pida, anoŋadi irau tamoot tol (60), ve pida anoŋadi irau tamoot liim (100).” *Yems 1:25*

Saveeŋ palelaaŋ to lam

(Lu 8:16-18)

²¹ Yesu isaav padi muul ighaze: “Laak, ighaze tamtoghon tigham lam eta inim, pale tipakudi pa oon, ma tizeeva ila watiŋ samba? Maau. Tisaroni iza imonau. *Mt 5:15; Lu 11:33*

²² Tovenen mbeb eta irau iyooŋ maau. Mbeb tisob to tiyooŋ, nene pale tipaghazonaŋ di, lesa tineep ghazonaŋa. Ve nŋar tisob to ngozaaŋ, nene pale tivot tighazonaŋ. *Mt 10:26; Lu 12:2*

²³ Tamtoghon to ighaze le taliŋa, ye irau ilooŋ saveeŋ tonene ve igham nŋar pani pooi.”

²⁴ Ghoru Yesu isaav padi muul ighaze: “Aghur talingamim pa saveen to alonloona, ve agham ngar pani pooi. Pasa, sa ngar to ighaze yam agham pa saveen tonene, Maaron pale ipamuula payam. Ighaze azuaria gham pa agham ngar pani pooi ve ataghoni, nene pale Maaron igham lemim ngar pida paam. *Mt 7:2; Lu 6:38*

²⁵ Pasa, tamtoghon to ighaze iwatag Maaron aliya ve itaghoni, nene pale Maaron iseen ngar toni pa ngar pida muul. Eemoghon ighaze tamtoghon eta iwatag Maaron aliya ris, ve itaghoni maau, nene pale Maaron ipas ngar ris to ineep to tamtoghon tonenen ighau pani, ve ye ineep sorok.” *Mt 13:12, 25:29; Lu 19:26*

Saveen palelaan to aniiñ uve to itub iza

²⁶ Yesu isaav padi muul ighaze: “Pooz to Maaron ngara, nene inimale ngeu eez to igham wit uve, ve ila isuruuv di ila uum, ve isasaan. *27-28* Mbon to naol ne, ye ighengheen. Ve ndag to naol ne, imundig ila ighamgham uraat toni pida. Ataam to aniiñ itub iza pani, nene ye iwatagi maau. Taan tau, to igham aniiñ tonenen itub. Tovenen paradi tingig pa taan tiza muun, ghoru rauadi tivot, ve tighur anonadi. *Yems 5:7*

²⁹ Sawa to aniiñ imatu, ngeu tonenen rikia moghon ila toman buza, ve imbut motmotini. Pasa, sawa to ngogaan aniiñ, tauto ivot wa.” *Syg 14:15+*

Saveen palelaan to mastet uve (Mt 13:31-32; Lu 13:18-19)

³⁰ Yesu isaav muul ighaze: “Pooz to Maaron, ngara vena? Pale tasavia iza to sa? ³¹ Nene inimale mastet uve. Mastet uve, nene gegegeu kat.* Mbeb tisob to taan uvedi tintina tilib pani. ³² Eemoghon ighaze tasuruuv mastet uve ila taan, nene pale itub iza tiina inimale ai, le ilib pa ndoor tisob to uum, ve ighur boga tintina paam. Tovenen man to tirovroov ila tata paronjania, yes irau tirei rumadi izala boga, leso tineep ila mastet tonenen yavyaava.”

³³ Yesu ivotia Maaron aliŋa pa tamtoghon ila saveeŋ palelaaŋ katindi tovene. Leso iraurau padi pa tilooŋa ve tigham ngar pani. ³⁴ Tovenen sawa isob to ye ivotia mos pa ival tiina, isavsaav ila saveeŋ palelaaŋ moghon. Eemoghon sawa to yesŋa taghoniŋa toni moghon tineep, ye ipagha-zoŋan saveeŋ isob pughu padi.

*Yesu isaav, ve yaghur ve dibom imaat
(Mt 8:23-27; Lu 8:22-25)*

³⁵ Ndag ee moghon tonenen, Yesu toman taghoniŋa toni tinepneep le rabrab izi, ghoru ye isaav padi ighaze: “Yo, anim tavool tala pa ya naliu paŋa ite.” ³⁶ Tovenen tighur ival tiina tila, ve taghoniŋa toni tiza waan to Yesu ineep izala pogho ne, ve tivot tila. Waan pida tila toman di paam. ³⁷⁻³⁸ Yesu iwat daba ila ali, ve izi igheen ila waan mbole. Igheen le lolo imaagh. Mala maau ve yaghur tiina kat imundig, le ipei dibom tintina. Ereman ivon ila waan lolo le rismoghon timarub. Tovenen taghoniŋa toni tivaŋa, ve tisaav pani

* **4:31:** Mastet uvedi, nene gegegeu kat tinimale ndog atulu ma mbuas uvedi.

tighaze: “Patoŋaan, umundig lak! Yom ugham ŋgar pait, ma maau? Paam talaleed tonene!”

³⁹ Yesu imundig, ve isaav ariana pa yaghur ini-male yanoonji. Ghoru isaav pa dibom ighaze: “Ai, iraua! Atem izi!” Rikia moghon yaghur imaat, ve taun tiina izi. ⁴⁰ Ghoru Yesu isaav pa taghoniina toni ighaze: “Yam amatughez pasa? Aghur ila sone?” ⁴¹ Taghoniina toni tighita mbep ghara-toona tonenen, ve matughezaan tiina kat igham di. Ve tiwasavon di tighaze: “Wai, ŋgeu tonene sei kat, to yaghur ve dibom paam tiloon aliŋa ve titaghoni?”

Mbo 65:7, 89:9, 107:29

5

Yesu indiiir avuvu samsamiadi katindi pa ŋgeu eez

(Mt 8:28-34; Lu 8:26-39)

¹ Yesu toman taghoniina toni tiraav tila tiloon naari to yes Gerasa to ineep ila ya naliu Galilaia paŋa ite. ²⁻⁴ Ndug tonowen, ŋgeu eez inepneep. Ye, avuvu samsamiadi katindi tizeeva, ve moghon moghon inepneep iloon ila yaam saambu pida to tigharaat di tinim naal pa mateeŋa. Sawa to Yesu iyaat izi pa waan, ŋgeu tonowen ipul ina to yaam saambu we, ve ilaagh inarua Yesu ila. Ŋgeu tonenen, sawa naol tikau pa ravraav toman sen. Eemoghon ikuup motmotin di, ve ighau ila. Pasa, ye tapiri tiina kat. Tovenen tamtoghon eta irau ikisi ve ikau muul maau. Ve tamtoghon eta irau ighami ate izi ne maau. ⁵ Mbon ve ndag, iwalaghaagh ila lolooz, ve ilonloon ila yaam saambu to tigharaat di tinim naal pa mateeŋa. Ve sawa isob,

imboboob sorok, ve ighoghorot tau pa yaam to ledi matadi.

⁶ Ye ighita Yesu to sagan we, ve ilaan inarua ila, ve itap izi Yesu nagho. ⁷⁻⁸ Yesu isaav pani ighaze: “Yom avuvu samia, ughau pani!”

Tovenen avuvu samia tonowen igham ngeu tonenen imboob aliŋa tiina kat ighaze: “Aii, Yesu! Yom Maaron Tiina To Ilib Pa Ndimaronŋa Tisob Ne Natu. Unum sualen pasa? You nambaan ilat payom? You natan roran ghom pa Maaron iza, ughur yabyabuŋ payou malep!” *Mt 25:41; Mk 1:24; Yems 2:19*

⁹ Yesu ighasoni ighaze: “Izam sei?”

Ye ipamuul aliŋa ighaze: “You izag Legion* (o ‘Ndiŋndiŋ Ndiŋndiŋ’). Pasa, yei ival kat.”

¹⁰ Ghoru avuvu samia tonenen itan roran Yesu ariana ighaze indii di tighau pa taan suruvu tonowen malep. ¹¹ Ndug tonowen, ŋgai katindi tinepneep ila lolooz dige, ve tighangan.

¹² Tovenen avuvu samsamiadi to tizeev ngeu tonenen titaŋ roran Yesu tighaze: “Ughur ghei niŋarua ŋgai tonowen. Upul ghei nilooŋ nila lolodi.”

¹³ Yesu iyok padi, tovenen tipul ngeu tonenen, ve inarua ŋgai tonowen tila le tizeev di tilooŋ tila lolodi. Ghoru tilaan taghon ndariri tizila, ve tiyatov di tizila ya lolo, ve tighun ya le tisob timatmaat. Ngai to timaat ne, irau ndiŋndiŋ ru (2000) ma venen.

¹⁴⁻¹⁵ Yes to tiŋginŋgin ŋgai, tighita mbbeb tonenen, ve tighau tila tipaesia varu izi paanu todi ve ndug

* **5:9:** ‘Legion,’ nene saveen Latin. Rouŋ eez to ndaaba irau tamtothon 6000, yes Roma tiwaata tighaze ‘Legion.’

pida to tineep tigharau di ne paam. Tovenen tamtoghon tisob tila tighaze tighita mbef to ivot. Tila tivot to Yesu, ve tighita ngeu to muun avuvu samsamiadi katindi tizeeva, ngar toni ivot poia wa. Ye indudi pa nonogiina ve mbole izi inepneep. Tovenen matughezaan tiina igham di. ¹⁶ Ghoroyes to tineep ve tighita mbef to ivot pa ngeu tonenen ve ngai, tipaesia mbef tonenen pa tamtoghon. ¹⁷ Ival tiina tiloon paesiin todi, ve titaan roran Yesu tighaze ipul ndug todi, ve ila pa ndug ite paam.

¹⁸ Tovenen Yesu imuul ila ighaze iza waan ve yesna taghoniina toni timuul tila. Sawa tonenen, ngeu to muun avuvu samsamiadi katindi tizeeva, ye inim ve itaan rorani ighaze iyok, ghoroyes iza todi ve yesna tila. ¹⁹ Eemoghon Yesu iyok pani maau. Isaav pani ighaze: “Umuul ula pa paanu tiom, ve usavia uraat tiina to Maaron igham payom ne varu pa nditam. Pasa, Maaron lolo isamin ghom ve iuul ghom uneep pooi.”

²⁰ Tovenen ngeu tonenen imuul ila, ve ivotia uraat tiina to Yesu igham pani ne varu irau ndug ndug to tineep ila taan suruvu to Dekapolis. Ival tisob to tiloon saveen toni, runadi iza pa Maaron tapiri le ngar todi isob.

Yesu igharaat liva eez, ve ipamundigin Yairus natu liva pa mateen

(Mt 9:18-26; Lu 8:40-56)

²¹ Yesu toman taghoniina toni tigham waan, ve timuul tila pa ya naliu paana ite. Sawa to tila tiloon, ival tiina kat tila tiluvut Yesu izi naari. ²² Ghorodaba eez, iza Yairus, ila ivot. Iza Yairus. Ye yesna ndiran pida tingin paanu tonowen rumai todi. Ye

ighita Yesu, ve iput aghe izi Yesu aghe pughu, ²³ ve itañ rorani ighaze: “Tiina tiou, natug liva igharau ighaze imaat. Unum tala ruum tiou, ve ughur nimam izala pogho. Leso imaat sob, ve tini poia muul.”

²⁴ Tovenen Yesu itaghoni ve yesuru tila. Tilaghaagh tila, ve ival tiina tikeet titaghon di. Yes tiwandiron di le tigrinj Yesu paam. ²⁵ Liva eez ilaagh itaghon di paam tila. Ye, moroghoonj to ndiliva ikisi irau ndaman saangul ve ru wa. ²⁶ Uraata katindi to moroghoonja titoova pa tiuuli, ve ye iyamaan yabyabuunj tiina ila nimadi, ve ipul yaam toni isob pa gholiinj di. Eemoghon todi eta irau iuuli maau. Maau kat. Yes totoova, eemoghon tigham le moroghoonj toni isami kat. ²⁷⁻²⁸ Liva tonowen iloonj Yesu varu wa. Tovenen mata injal ighaze: “You nakis nonogiinja toni rita, ghoru moroghoonj tiou tonene isob, ve tinig poia.” Tauto ila itaghon ival tiina tonowen, ve iloonj ila lolodi, ve indirndiir ila ila le ikis Yesu nonogiinja toni. *Lu 6:19*

²⁹ Rikia moghon, sinj imot pani, ve iyamaan tau ighaze tini poia wa. ³⁰ Ve Yesu paam, iyamaan tau ighaze tapiri to ulaanj igham tamtoghon eta wa. Tovenen indaleel, ve mata ila pa ival tiina, ve ighason di ighaze: “Ai, sei ikis nonogiinja tiou?”

³¹ Taghoniinja toni tipamuul aliña tighaze: “Pughu vena to ughason ughaze sei ikis ghom? Ughita. Nene ival tiina tiluvutin ghom ve tiwandiron di. Eta avaat igirinj ghom.”

³² Eemoghon Yesu mata inesnes ighaze ighita sei kat to igham ngar tonenen. ³³ Liva tonenen iwatag mbeb to ivot pani ne. Tovenen matughezaanj tiina

ighami le tini irur, ve ila iput aghe izi Yesu nagho. Ghoro ivotia mbeb tisob to tivot pani ne.

³⁴ Yesu isaav pani ighaze: “Livug, ghurla tiom, tauto iuul ghom ve tinim poia wa. Ula toman lolom poia.” *Mk 10:52; Lu 7:50, 17:19*

³⁵ Yesu isavsaav sone, ve ndiran pida tineep Yairus ruum toni ve tinim, ve tipaes pani tighaze: “Olman, ughereb sorokin patonaaŋ tonanan inim pasa? Natum liva imaat wa.”

³⁶ Eemoghon Yesu taliŋa irab saveeŋ todi. Tovenen isaav pa Yairus ighaze: “Umatughez malep. Ukis ghurla tiom ariana.” ³⁷ Ghoro ingalsekin ival tiina ighaze tila tomani malep. Ve igham Petrus, Yakobus, ve tazi Yoan, ve yes moghon tila. ³⁸ Tila tivot ruum to Yairus, ve Yesu ighita tamtoghon titaŋtaŋ pa liva kainaŋen toman oroor tiina, ve tiloŋloŋ tivotvot pa ruum lolo. ³⁹ Tovenen ilooŋ ila ruum lolo, ve isaav padi ighaze: “Pughu vena to yam ataŋtaŋ ve aghamgham oroor tiina? Liva kainaŋen imaat maau. Ye igheen.”

⁴⁰ Yes tilooŋ saveeŋ toni tonene, ve tiŋiŋ pani. Yesu izurun di tisob tivot tila pumuri. Ghoro igham liva kainaŋen tina ve tama, toman taghoniŋa toni tol tonenen, ve yesŋa tilooŋ tila ruum lolo to liva kainaŋen igheen pani. ⁴¹ Yesu ikis nima, ve isaav pani ighaze: “Talita kum!” Saveeŋ tonene, pughu tovene: “Liva kainaŋen, you nasaav payom: Umundig!” *Lu 7:14*

⁴² Rikia moghon mata iyaryaar, ve imundig ilaagh. Liva kainaŋen tonenen, ndaman toni irau saangul ve ru. Tamtoghon tighita mbeb

gharatoonja tonenen, le rujadi iza ve ngar todi isob. *Yo 11:43+*

⁴³ Eemoghon Yesu ingalsekin di ariana ighaze tisavia mbeb tonenen varu pa tamtoghon eta malep. Ghoru isaav padi ighaze tigham aniin inim, lesu liva kainaen ighan.

6

Tamtoghon to Nasaret matadi velegin Yesu (Mt 13:53-58; Lu 4:16-30)

¹ Yesu ipul ndug tonowen, ve imuul ila pa ndug toni pughu. Ve taghoniina toni titaghoni ve yesna tila. ² Sawa to umbom patabuan, Yesu iloon ila rumai todi, ve ipatoot di pa Maaron aliya. Tamtoghon katindi to tiloon saveen toni, rujadi iza pa ngar toni, ve tisaav tighaze: “Wai, ngeu tonene igham ngar ve tapiri tiina tonene izi sine? Ngar popoia to isasavia di ne, ye igham di ila to sei? Pughu vena to uraat gharatoonjadi naol tivotvot ila ye nima? *Yo 7:15*

³ Vena, ye to ndug ite, to takankaan pani ne? Ye, ngeu sorok to rein ruum moghon. Maria natu. Ve nditazi Yakobus, Yoses, Yudas, ve Simon, toman ndilivu tisob, to tinepneep toman ghiit ne.” Tovenen matadi velegini, ve lolodi pa tighur ila toni maau. *Yo 6:42*

⁴ Tauto Yesu isaav padi: “Ighaze tamtoghon eta inim propet to Maaron, nene pale tau ndug toni pughu toman sin toni, ve yes to tinep tomani ila ruum toni ne, matadi velegini. Eemoghon ighaze ye ila ndug ite, nene pale titandag pani ve tipait varu.” *Yo 4:44*

⁵ Tovenen Yesu irau igham mbeb gharatoonja tiina eta izi tonowe maau. Ye ighur nima izala moroghoonja enjaenja poghodi le tinidi popoia. ⁶ Ve igham ngar naol pa ndug toni pughu: Pughu vena to yes tighur ila toni maau?

Tovenen Yesu imundig, ipul ndug toni pughu, ve ilaghlaagh irau ndug ndug, ve ipatoot di pa Maaron aliija.

Yesu imbaan taghoniija toni saangul ve ru pa uraat

(Mt 10:5-15; Lu 9:1-6)

⁷ Ghoru ipoi taghoniija toni saangul ve ru tinim, ve ighur di runjaruŋa ighaze tila pa uraat. Ve irei tapiri irau di, ve ighur avuvu samsamiadi tineep ila sambadi, leso tindiir di tighau. ⁸⁻⁹ Ve isaav padi tovene: Sawa to tila, yes irau tilaagh toman mbeb naol maau. Tighur duduunja to aghedi, ve tikis titi moghon. Irau tigham mbeb inimale aniiŋ ve pelpeel maau, ve yaam eta irau ineep ila lugluug todi maau. Nonogiija todi paam, irau tigham runjaruŋa maau. Ee moghon to ineep ila tinidi, nene iraua. ¹⁰ Ve Yesu isaav padi: “Ighaze yam ala avot ndug eta, ruum sine to tighur gham pani, ghoru aneep ila ruum tonenen moghon le irau apul ndug tonowen ve ala. ¹¹ Ve ighaze ndug eta lolodi pa ghamuun gham maau, ve tizurun gham toman saveen tiam, yam atut aghemim, ve ghavuur todi izi,* ghoru apul ndug tonenen ve ala. Leso inim ghilaloonj padi pa sosor todi.”

* **6:11:** Paesiin to saveenj waaro tonene ineep ila Mt 10:14.

¹² Yesu isavsaav padi le isob, ghoru tila ve tivotia Maaron aliņa pa tamtoghon ve tisaav padi tighaze: “Yam apul ngar tiam samsamia, ve atoor ngar tiam ila pa Maaron.” ¹³ Ve tindirndiir avuvu samsami-adi katindi tighaughau, ve timusmus ngoreen to oliv izala moroghoonja katindi poghodi, ve tisun Maaron padi le tinidi popoia muul. *Yems 5:14+*

Mateen to Yoan ngeu rughuzaanja
(*Mt 14:1-12; Lu 3:19-20, 9:7-9*)

¹⁴ Sawa tonenen, Yesu varu ilaan irau ndug naol, ve kinik Erod iloonja paam. Tamtoghon pida tighaze: “Nowe avaat Yoan ngeu rughuzaanja. Ye imaat, ve Maaron ipamundigini pa mateen. Tauto tapiri tiina ineep toni, ve ighamgham mbeb gharatoonjadi.” *Mk 8:28*

¹⁵ Ve tamtoghon pida tighaze: “Maau. Ye avaat propet Iliia to imuul inim.” Ve pida tighaze: “Maau, ye avaat igham uraat inimale propeta munjinadi pida.” *Mt 16:14; Lu 9:19*

¹⁶ Sawa to Erod iloon Yesu varu, ye isaav pa tau ighaze: “Nowe avaat Yoan. Ngeu to nambut motin lua, tauto aazne Maaron ipamundigini pa mateen.” ¹⁷⁻¹⁹ Ye isaav tovene pasa, mata ingal ngar to ye igham pa Yoan. Ngar tovene: Muun, Erod isad togha Pilip azuwa Erodias ve ivaii. Sawa tonenen, Yoan ilala toni, ve inoknok saveen pani ighaze: “Ngar to ugham pa togham azuwa, nene denja pa tutuun to Maaron maau.” *Wkp 18:16*

Yoan saveen toni igham Erod azuwa ate yabyab. Tovenen ikalkaal ataam pa irabi imaat. Eemoghon iraua maau. Tauto Erod imbaan tamtoghon pida tila tikis Yoan, ve tikau pa

ravraav, ve tighuri iloon ila ruum to yabyabuun. Leso igham azuwa lolo poia. ²⁰ Erod iwatag ighaze Yoan, ye ngeu patabuan, ve ngeu denja eez ila Maaron mata. Tovenen imatughez pani. Sawa to Yoan isavsaav pani, saveen toni ingali le igham ngar naol. Eemoghon Erod ighaze le ilonloon saveen toni. Tauto sawa to Yoan ineep ila ruum to yabyabuun lolo, Erod igham poiani.

²¹ Tinepneep le sawa poia eez ivot pa Erodias irab Yoan imaat. Tiza pa sawa to Erod tina ipooa, ghoru Erod igham ghanghaniin tiina, ve ipoi yes daba to tinjin uraat toni, ve yes daba to malmal, toman ndiran pida to Galilaia to izadi tintina ne paam tinim, ve yesna tilup di pa ghanghaniin.

²² Sawa tonenen, Erodias natu liva iloon ila, ve itor ila matadi, le isad Erod toman ndita tonowen atedi. Tovenen Erod ipiyaav aliya pani ighaze: “Wais, sa mbab to ighaze yom ughason ghou pani, you pale naghama payom!” ²³ Ve ipariaan saveen mbuaan toni tonowen le iyaryaan kat ighaze: “Onoon sala! Sa mbab to ighaze ughason ghou pani, you pale naghama payom. Ighaze yom ughaze navalag mbab tisob to nanjin di ne, ve naghama lem pida, nene poia paam!”

²⁴ Erod isavia saveen tonene le isob, ghoru liva paghu ivot ila pumuri, ve ighason tina ighaze: “Vena, pale naghasoni pa sa mbab?”

Tina isaav pani ighaze: “Ughasoni pa Yoan ngeu rughuzaana daba.”

²⁵ Tovenen liva paghu rikia moghon ila ivot to kinik Erod muul, ve isaav pani ighaze: “You naghaze yom ughur Yoan ngeu rughuzaana daba ila oon, ve ughami inim tiou to aazne.”

²⁶ Kinik Erod iloon saveen tonene le lolo ipatanan kat. Eemoghon irau itoor aliņa muul maau. Pasa, imbua saveen ariņa pani ila ndita to yesņa tilup di pa ghanghaniņ ne matadi wa. ²⁷⁻²⁸ Tovenen rikia moghon imbaan ndaaba toni eez ighaze ila imbut motin Yoan lua, ve igham daba inim. Ndaaba tonowen itaghon Erod aliņa, ve ila imbut motin Yoan lua. Ghoru ighur daba ila oon lolo, ve ighami inim, ve izuzuuna ila to liva paghu tonenen. Ghoru ye ana isakia ila to tina.

²⁹ Yes taghoniņa to Yoan tiloon mbeb tonenen varu. Tovenen tila tigham Yoan paatu, ve tila tighuri iloon ila yaam saambu eez to tigharaata inim naal pa mateņa.

Yesu ipan tamtoghon ndiņndiņ liim (5000)

(2King 4:42-44; Mt 14:13-21; Lu 9:10-17; Yo 6:1-14)

³⁰ Yesu mbaņoonņa toni tigham uraat le isob, ghoru timuul tinim tivot to Yesu, ve tipaes pani pa uraat naol to tigham di, toman saveen isob to tipatoot tamtoghon pani. ³¹ Sawa tonenen, tamtoghon katindi tilala ve tinimnim, le Yesu toman taghoniņa toni ledi soso eta to atedi izi ve tighan aniņ maau. Tovenen Yesu isaav padi ighaze: “Yo, amundig ve tala pa ndug balim eta. Leso engengiit taneep ve ateed izi.”

³² Tovenen tigham waan tighaze tila pa ndug balim eez. Leso engendi tineep tonowen, ve atedi izi. ³³ Eemoghon ival tiina tighita di tiraav tila, ve tighilaal di pa ghaon todi. Tovenen tamtoghon to ndug naol tilaagh taan, ve titaghon Yesu tila. Yesu

toman taghoniina toni tighaughau sone, ve ival tiina tonowen timuun tila tivot ndug to Yesu toman taghoniina toni tighaze tila pani, ve tisanajan.

³⁴ Mala maau ve Yesu toman taghoniina toni anadi tinim tiloon ndug tonowen. Yesu ighita ival tiina tonenen, le lolo isamin di. Pasa, yes tineep tinimale sipsip to ledi nginiina maau. Tovenen ye ipamundigin saveen toni, ve ipatoot di pa mbeb naol.

³⁵ Tinepneep le rabrab izi, ghoru taghoniina toni tila tisaav pani tighaze: “Ou, taneep izi ndug balim, ve mbon izi wa. ³⁶ Usaav pa ival tiina tila pa ndug pida to tineep tatanjan. Leso tighol adi aniin ve tighan.”

³⁷ Eemoghon Yesu isaav padi ighaze: “Maau. Yam taumim agham aniin padi ve tighan.”

Yes tipamuul aliina tighaze: “Wai, yom ughaze yei nila nighol aniin pa ival tiina tonene? Ighaze nighol aniin irau yaam denari 200, pale irau di wa?”

³⁸ Tovenen Yesu isaav padi ighaze: “Ala aghita. Amim mberet piiz inepneep?”

Yes tila tighita le isob, ghoru timuul tinim, ve tipaes pani tighaze: “Iit aad mberet liim, ve iigh ru moghon.”

³⁹⁻⁴⁰ Ghoru Yesu isaav padi ighaze tighur ival tiina tonenen ila rouj rouj, ve tisaav padi lesu mboledi izi kikiliin popoia tonowen pogho. Tovenen titaghon Yesu aliina, ve mboledi izi tonowe tila rouj rouj. Rouj pida irau tamtoghon tamoot liim (100), ve rouj pida irau tamoot ru saangul (50).

⁴¹ Ghoru Yesu igham mberet liim toman iigh ru tonowen, ikis di, ve mata izala pa sambam, ve

ipait Maaron pa aniiṅ tonenen. Isuṅ le isob, ghero iteev mberet tonenen, ve ighuri ila taghoniina toni nimadi, lesu anadi tila tireii pa ival tiina. Ye igham ṅgar raraate pa iigh ru tonenen paam, ve ival tiina tighan. ⁴² Tovenen ival tisob tighan le apodi isuṅ. ⁴³ Ve mberet toman iigh to tighan ve suruvu izi ineep, nene taghoniina toni tinṅooga, ve tinonog di tila nakaral saangul ve ru le tivon. ⁴⁴ Yes to tighan aniiṅ tonenen, yes nditamoot moghon, irau ndiṅndiṅ liim (5000) ma venen.

*Yesu ilaagh izala ya pogho
(Mt 14:22-33; Yo 6:15-21)*

⁴⁵ Tighan le isob, ghero Yesu ipasul taghoniina toni ighaze tiza waan, lesu timuun tivoool tila pa ndug Betsaida to ineep ila ya naliu paṅa ite. Ve ye ineep, lesu ighur ival tiina tonowen timuul tila pa ndug todi todi. ⁴⁶ Ye ighur di tila, ghero izala pa lolooz eez, lesu ineep tonowe ve isuṅ. *Mk 1:35*

⁴⁷ Waan to taghoniina toni tiza ve tila, nene ighaughau ila le ivot bodbodaan to ya naliu, ghero mboṅ izi padi. Ve Yesu enṅeni izi ineep izi taan. ⁴⁸ Mata ila le ighita patanani ivot pa taghoniina toni. Pasa, yes tisoop yaghur ve tila. Tovenen tigham uraat tiina pa ṅgoraan. Yesu inepneep le igharau ighaze ndugitun, ghero izila naari, ve ilaagh izala ya pogho inarua di ila, le ighaze isalib padi. ⁴⁹⁻⁵⁰ Taghoniina toni matadi ila le tighita Yesu ilaghlaagh izala ya pogho ve inim. Yes tisob tighita ve tighaze pa mariaam eta. Tovenen matughezaan tiina igham di ve tisaṅeeṅ.

Emoghon Yesu rikia moghon ve isaav padi ighaze: “Ai, amatughez malep. Atemim izi. Nene

you.” ⁵¹ Ghoru ila iza waan toman di. Sawa tonene, yaghur ve dibom isob. Taghoniina toni tighita mbeb gharatoona tonenen, le ngar todi isob. ⁵² Pasa, mbeb gharatoona to Yesu igham pa mberet, nene igham ngar todi ivot sone. Ledi ghilaloon maau pasa, lolodi iyaryaan kat. *Mk 8:17*

Yesu igharaat moroghoona katindi izi ndug (Mt 14:34-36)

⁵³ Yesu toman taghoniina toni tivool tila pa ya naliu pana ite, ve tiloon naari to ndug Genesaret, ve timbit waan todi tonowe. ⁵⁴ Sawa to tiyaat tizi pa waan, ival tiina rikia moghon ve tighilaal Yesu. ⁵⁵ Tovenen tilaan tila, ve tipaesia varu irau ndug tisob to tineep tigharau. Tovenen sawa to ighaze tamtoghon tiloon tighaze Yesu ila ivot ndug eta, ghoru timbadbaad moroghoona todi izala ndiu, ve tinarua tila, leso iuul di. ⁵⁶ Yesu ilaghlaagh irau ndug tintina, ndug geegeu, ve taghon ndug dige dige paam. Sawa to ye ila ivot ndug eta, ghoru tiyou moroghoona todi tila maran, ve titan ro-rani tighaze tikis nonogiina toni dige rita moghon, ghoru poia. Ve ival tisob to tikisi, ye igham di tinidi poipia. *Mt 9:20, 14:36; Mbanj 19:12*

7

Tutuun to Maaron ilib pa Yuda nditimbudi tutuun todi (Mt 15:1-9)

¹⁻⁴ Ndiran tutuuna toman Yuda pida paam timbees pa Maaron itaghon tutuun to nditimbudi titaghoni muun ve inim. Ngar todi tovene: Irau

tighan aniiñ sorok maau. Timen nimadi itaghton tutuunj todi le tingalaan ila Maaron mata, ghorotighan. Ve ighaze tila nal ina, ve timuul tinim, nene yes irau titir ya izala poghodi, ve timen muun ilale. Leso tingalaan ila Maaron mata muul, ve tighan aniiñ. Yes ledi tutuunj naol tovene. Tutuunj pida tinjarua menuunj uur ve rubruub, ve tutuunj pida tinjarua mbeb pida paam. *Mt 23:25+*

Ndiran tutuunja pida toman ngara pida to tutuunj tipul Yerusalem, ve tila tineep toman Yesu. Yes tighita taghoniinja toni titaghton tutuunj todi to menuunj nimadi maau, ve rikia moghon tighan aniiñ. Tovenen tighita di, le irau lolodi maau. Pasa, taghoniinja toni nimadi ingalaan maau, ve tigham aniiñ ve tighan. *Lu 11:38*

⁵ Tovenen tighason Yesu tighaze: “Ughita. Taghoniinja tiom nimadi ingalaan maau, ve tighan aniiñ. Pughu vena to titaghton tutuunj to nditimbuud maau?”

⁶ Yesu ipamuul alinjadi ighaze: “Yam ndiran kaaromnja. Aparim taumim sorok pa ghurla tiam! Muun, propet Isaia ivotia Maaron alinja waaro eez to denja kat pa ngar to yam aghamghami. Isaav tovene:

‘Ndiran tonene tipapait ghou sorok pa avodi uli moghon.

Eemoghon lolodi, nene ineep mala kat payou.

⁷ Saveen ve tutuunj katindi to tipatoot tamtoghon pani, nene itaghton ngar tiou maau. Itaghton ngar to tamtoghon moghon.

Tauto sunjuunj ve mbesoonj todi to tighamgham payou, nene inim mbeb sorok,

ve le anona maau.’ ” *Is 29:13; Kol 2:20+; Tit 1:14*

⁸ Ve Yesu isaav padi muul ighaze: “Tutuun to Maaron tau ighuri, yam apuli wa. Ve tutuun to tamtoghon tighuri, tauto akisi tunja ve ataghoni.”

⁹ Yesu iseen saveen toni muul ighaze: “Yam apul murimim pa tutuun to Maaron, ve apuli izi ineeple. Leso apariaan tutuun to nditimumim tigham payam, ve ataghoni. Ngar tovene, yam araua kat! ¹⁰ Aghita. Tutuun to Mose isaav tovene:

‘Matam lonlonainja pa tamam ve tinam, ve utandag padi.

Ve ‘ighaze tamtoghon eta ipiyaav saveen samia pa tama ma tina, ye irau imaat.’

Igham 20:12, 21:17

¹¹⁻¹² Eemoghon yam asavsav tovene: Ighaze tamtoghon eta le mbef to iuul tama ma tina pani, eemoghon igham padi maau, ve isaav padi ighaze: ‘O, mbef tonene, you irau naghama payam maau. Pasa, nawaat Maaron iza pani wa.’ Ighaze tamtoghon eta igham tovene, ve muri itoor ngar toni ve ighaze igham mbef tonenen pa tama ve tina, yam angalsekini aghaze ye igham tovene malep.

¹³ Tovenen tutuun to nditimumim tigham payam ve aazne ataghoni, nene igham gham atatan Maaron saveen toni izi inim mbef sorok. Ve ngar tiam naol to aghamgham di, nene raratedi moghon.”

Mbef to igham tamtoghon tasami ila Maaron mata

(Mt 15:10-20)

¹⁴ Yesu isavsav toman di le isob, ghoron ipoi ival tiina tinim toni muul, ve isaav padi ighaze:

“Yam asob aloon saveen tiou tonene, ve agham ngar pani pooi. ¹⁵⁻¹⁶ Mbeb to tamtoghon tighami ve tighani izila pa apodi ne, eta irau igham di tasami ila Maaron mata ne maau. Ngar samsamia to tineep ila lolodi ve tivotvot, tauto tigham di tasami ila Maaron mata.” *Mbanj 10:14+; Ro 14:14,20; 1Tim 4:4*

¹⁷ Yesu ipul ival tiina tonowen tineep pumuri, ve iloon ila ruum lolo, ghoru taghoniinja toni tighasoni pa saveen toni pughu. ¹⁸ Ye isaav padi ighaze: “Wai, yam paam lemim ngar maau? Aghilaal sone? Mbeb to tamtoghon tigham di ve tighan di, eta irau igham di tasami ila Maaron mata ne maau. ¹⁹ Pasa, mbeb tovene igham mbeb eta pa lolodi maau. Izila pa apodi moghon, ve mala maau timbebeghazi ilale.”

Yesu saveen toni tonene ipaghazonan ghiit ighaze mbeb to naol ne, nene poia pa ghaniinj. Eta irau igham ghiit tasami ila Maaron mata maau.

²⁰ Ve Yesu isaav muul ighaze: “Ngar samsamia to tineep ila tamtoghon lolodi ve tivotvot, tauto tigham di tisami ila Maaron mata. ²¹⁻²² Pasa, ngar samsamia to tineep ila tamtoghon lolodi ve tivotvot, tauto tipamundigin di ve tigham ngar samsamia naol inimale: tighur maat, tiyub, tirab tamtoghon imaat, tiwaghamun vaiuun, matadi aniinj, tigham didiaan, tigham kaarom, matadi samia tinimale ngavuun ve ngai, tighur koi pa nditadi to ledi mbeb katindi, tipiyaav saveen samia pa nditadi ve Maaron paam, tipait taudi izadi, ve tigham ngar samsamia pida paam tinimale yes to tikankan pa Maaron. ²³ Ngar samsamia naol

tonene to tineep ila tamtoghon lolodi ve tivotvot, tauto tigham di tisami ila Maaron mata.”

*Grik tidi eez to Ponisia ighur ila to Yesu ariana
(Mt 15:21-28)*

²⁴ Yesu ipamundigin laghoon toni muul, ve ipul ndug tonowen, ve ilaagh ila ivot taan suruvu to ndug tiina Tair ineep pani. Ghoru iloon ila ruum eez to ndug tonowen ve ineep. Ina to nepoon tonowen, ye ighaze tamtoghon tiwatagi malep. Eemoghon maau. Pasa, tamtoghon tighita wa.

²⁵⁻²⁶ Liva eez to ndug tonowen, avuvu samia izeev natu liva. Liva tonowen, ye Yuda maau. Ye Grik tidi to taan Ponisia to ineep ila taan suruvu to Siria. Ye iloon Yesu varu, ve rikia moghon injarua Yesu ila, itap izi Yesu aghe pughu, ve itan rorani ighaze indiir avuvu samia tonowen ighau pa natu liva.

²⁷ Yesu isaav pani tovene: “Ighaze tasad aniin to ndipain, ve tapiyaava rikia moghon ila ngavuun tighani, nene denja maau. Ndipain tighan muun le apodi isun, ghoru tapiyaav aniin pida ila pa ngavuun tighan.”*

²⁸ Liva tonenen ipamuul alina ighaze: “Tiina, alinam poia. Eemoghon ngavuun paam tisanjan. Ighaze ndipain tighanghan, ve aniin ngiira ngiira itaptap izi taan, nene inim ngavuun adi pa tighan.”

* **7:27:** Saveen to Yesu tonene pughu tovene: Ye pale igham uraat ila yes Yuda lolodi le isob, ghoru pooz to Maaron ila irau ndug ndug to Yuda maau ne paam.

²⁹ Yesu ilooŋ saveeŋ tonene, ve isaav pani muul ighaze: “Yom upamuul aliŋag le denja kat. Tovenen umuul ula pa ruum toman lolom poia. Pasa, avuvu samia ighau pa natum liva wa.”

³⁰ Tovenen liva tonenen imuul ila pa ruum, ve ighita natu liva ighengheen izala watiin toni. Avuvu samia ighau pani ve tini poia wa.

Yesu igharaat ngeu eez to taliŋa toman avo ivool

³¹ Yesu ipul taan suruvu to Tair, ve isakia laghoon toni ila ivot ndug Sidon. Ghoru iluvut muul inim, ve imbut taan suruvu to Dekapolis, ve ila ivot ya naliu Galilaia muul. *Mt 15:29+*

³² Ye inepneep tonowe, ve tigham ngeu eez ila toni. Ngeu tonowen, taliŋa ipam, ve irau isavia saveeŋ ighazoon maau. Tovenen titaŋ roran Yesu tighaze ighur nima izala ngeu tonenen pogho, leso tini poia. ³³ Yesu ighami ve yesuru tila sagan ris pa ival tiina, ghoru izeev nima u ru ilooŋ ila ngeu tonenen taliŋa. Le isob, ghoru injazub ila nima, ve ighur nima ila ngeu tonenen yama. *Mk 8:23; Yo 9:6*

³⁴ Ghoru mata iza pa sambam, iyavan, ve isaav pani ighaze: “Epata!” (Saveeŋ tonene, pughu tovene: ‘Ukaak.’)

³⁵ Rikia moghon ve ngeu tonenen taliŋa toman avo pakia, ve isaav aliŋa ivot ighazoon. *Is 35:5+*

³⁶ Yesu ingalsekin di ariana ighaze tivotia mbeb gharatoonja tonenen varu pa tamtoghon eta malep. Eemoghon maau. Onoon, ye ingalsekin di pae katindi. Eemoghon yes tinoknok votiaan mbeb tonenen varu gha ila. ³⁷ Tamtoghon tisob to tilooŋ mbeb tonenen varu, rujadi iza kat le ngar

todi isob, ve tisaav tighaze: “Wai, ngeu tonene, ye iraua kat. Mbeb tisob to ye ighamgham di, nene popoia moghon. Aghita. Yes to taliñadi pamu, ve yes to avodi ivool ne paam, ye igham di tilonloon saveen ve tisavsaav.”

8

Yesu ipan tamtoghon ndiñndiñ paan (4000) (Mt 15:32-39)

¹ Sawa tonenen, ival tiina kat tila tilup di toman Yesu muul, ve yesña tinepneep le aniiñ todi isob. Tovenen Yesu ipoi taghoniinja toni tinim, ve isaav padi ighaze: ² “You lolog isamin ival tiina tonene. Pasa, itiña takaria nepoon ve mbon inim tol wa. Ve adi aniiñ eta to tighan maau. ³ Ighaze naghur di tila toman pitool di, nene pale tapiridi isob ve matadi ililiit izi ataam luvuña. Pasa, tamtoghon todi pida tilaagh ndug mala tinim.”

⁴ Taghoniinja toni tipamuul aliña tighaze: “Wai, iit taneep izi ndug balim. Pale tagham aniiñ sine ve tagham pa ival tiina tonene?”

⁵ Tovenen Yesu ighason di ighaze: “Mberet tiam piiz inepneep?”

Yes tipamuul ghasoniin toni tighaze: “Liim ve ru.”

⁶ Ghoru Yesu isaav pa ival tiina mboledi izi taan, ve igham mberet liim ve ru tonenen, ve ipait Maaron pani. Le isob, ghoru iteeva, ve ighuri ila to taghoniinja toni. Leso anadi tila tireii pa ival tiina. Tovenen tighami tila ve tireii padi. ⁷ Yes adi iigh geegeu pida paam. Yesu ipait Maaron pa iigh tonenen le isob, ghoru isaav padi tila tireii pa tamtoghon. ⁸ Ival tiina tonowen tighan le apodi

isun. Ve avodi muri to izi, taghoniina toni tinguog di, ve tinonog di tila nakaral tintina liim ve ru le tivon. ⁹⁻¹⁰ Ival tiina to tighan aniin tonenen, yes irau ndiindin paan (4000) ma venen. Tighan le isob, ve Yesu ighur di timuul tila pa ndug todi todi. Ghoru rikia moghon yesna taghoniina toni tizila muul pa naari, ve tiza waan todi, ve tiraav tivool tila pa taan suruvu to Dalmanuta.

Ndiran tutuuna tighaze Yesu igham mbeb ghara-toona eta inim ghilaloon padi

(Mt 12:38-39, 16:1-4; Lu 11:16,29)

¹¹ Yesu toman taghoniina toni tinepneep tonowe, ve ndiran tutuuna pida tinarua tila tighaze titoova. Yesna Yesu tiwazoran di, ve tizoorndug tighaze ye igham mbeb gharatoona eta inim ghilaloon padi ve tighita. Leso tighur ila tighaze Maaron to sambam ineep tomani pa uraat toni. *Yo 6:30*

¹² Yesu iyavan inim yasiloon padi, ve isaav padi toman lolo ipatanan kat ighaze: “Oyais, pughu vena to ndiran to aazne tizuaria di pa ghitoon ghilaloon? You nasaav payam kat: Maaron irau ipatoon mbeb eta inim ghilaloon padi ne maau. Maau kat.” ¹³ Ghoru ipul di tineep, ve izila naari ve iza waan muul, ve yesna taghoniina toni timuul tivool tila pa ya naliu pana ite.

Yis to Erod ve ndiran tutuuna

(Mt 16:5-12)

¹⁴ Taghoniina toni lolodi imaagh ve tigham adi taman maau. Tigham mberet ee moghon kat to ineep izi waan. ¹⁵ Yes tighaughau tila, ve Yesu

mata iŋgal ŋgar samsamia to Erod ve ndiran tutuŋa. Tovenen iveivei pa taghoniŋa toni ighaze: “Matamim imosmoos, ve apatum gham pa yis to Erod ve ndiran tutuŋa!” *Lu 12:1; 1Kor 5:6+*

¹⁶ Eemoghon taghoniŋa toni tighilaal saveeŋ toni pughu maau. Tovenen tiwasavon di tighaze: “Ye avaat isaav pait pasa, lolood imaagh ve tagham aad mberet maau.”

¹⁷ Yesu iwatag ŋgar todi wa. Tovenen isaav padi muul ighaze: “Yam awayoun avomim pa mberet pasa? Aghilaal ghou sone? Lemim ŋgar maau? Lolomim avaat iyaryaan kat, tauto aghazoon payou sone. *Mk*

6:52

¹⁸⁻¹⁹ Yam lemim matamim ve taliŋamim. Pughu vena to aghita mbeb maau, ve alooŋ saveeŋ maau? Lolomim imaagh wa? Sawa to nateev mberet liim moghon pa tamtoghon ndiŋndiŋ liim (5000), yam aŋgoog aniŋ pida pida izila nakaral tintina piiz le tivon?”

Yes tipamuul aliŋa tighaze: “Saangul ve ru.” *Mk 4:12; Mban 28:26+*

²⁰ Yesu ighason di muul ighaze: “Ve sawa to nateev mberet liim ve ru pa tamtoghon ndiŋndiŋ paan (4000), yam ayoun aniŋ pida pida izila nakaral piiz?”

Yes tipamuul aliŋa tighaze: “Liim ve ru.”

²¹ Ghoru Yesu isaav padi ighaze: “Vena? Aghilaal sone?”

Yesu igharaat mata pisi eez izi ndug Betsaida

²² Yesu toman taghoniŋa toni tila tilooŋ izi ndug Betsaida. Ghoru tamtoghon pida tigham ŋgeu mata pisi eez inim toni, ve titan roran Yesu tighaze

ye ighur nima iza ila ngeu tonowen pogho, ve igharaat mata. ²³ Tovenen Yesu ikis mata pisi tonenen nima, ve igherebi ve yesuru tipul paanu, ve tivot tila sagan. Yesuru tiyoon tonowe, ve Yesu ighur n̄azuba ila ngeu tonenen mata, ve nima ru izala pogho. Ghoru ighasoni ighaze: “Vena, ughita mbeb eta, ma maau?”

²⁴ Ngeu tonenen mata ila, ve isaav pani ighaze: “Vee! You naghita tamtoghon pida tilaghlaagh. Eemoghon naghita poian di maau. Ghitonadi ini-male ai ma venen.” ²⁵ Tovenen Yesu ighur nima ila ikis ngeu tonenen mata muul. Ngeu tonenen itugtug mata ila ila le mata pakia ve ighita mbeb to naol ighazon. ²⁶ Ghoru Yesu isaav pani ighaze: “Umuul ula pa paanu malep. Malmalim ula pa ruum tiom.”

Petrus ivotia Yesu ighaze ye Mesia

(Mt 16:13-20; Lu 9:18-21)

²⁷ Yesu toman taghoniina toni tipul ndug Bet-saida, ve tighaze tila pa ndug geegeu pida to tigharau ndug tiina Sisarea Pilipai. Tilaghlaagh taghon ataam tila, ve Yesu ighason di ighaze: “Laak, tamtoghon tigham n̄gar tighaze you sei?”

²⁸ Yes tipamuul ghasoniin toni tighaze: “Ndiran pida tighaze yom Yoan ngeu rughuzaana, ve pida tighaze yom propet Ilia, ve pida tighaze yom propet ite paam.”

²⁹ Yesu ighason di muul ighaze: “Ve yam taimim, aghaze you sei?”

Petrus ipamuul aliina ighaze: “Yom Mesia.”* *Yo 6:68+, 11:27*

* **8:29:** Paesiin to saveen waaro tonene ineep ila Mt 16:16.

³⁰ Petrus isavsaav le isob, ghero Yesu ingalsekin di ariana ighaze tivotia saveen tonenen pa tamtohton eta malep.

Yesu isavia mateen ve mundigiin toni

(Mt 16:21-23; Lu 9:22)

³¹ Sawa tonenen, Yesu imundig ve ipatoot taghoniina toni ighaze: “Tamtohton Natu pale imbaad patanani naol, ve yabyabuun tiina ighami itaghton Tama Maaron ngar toni. Ve yes pooza toman yes daba to watoonrau, ve yes ngara to tutuun pale tizuruni, ve tirabi imaat. Eemoghon mbon inim tol, ye pale imundig pa mateen.”

³² Yesu isaav ghazona padi. Tovenen Petrus ighami ila dige, ve iyaana. ³³ Eemoghon Yesu itoora, mata imuul pa taghoniina toni pida, ve iyaan Petrus ighaze: “Sadan, ughau ula pa murig! Ngar tiom itaghton Maaron ngar toni maau. Yom utaghton ngar to tamtohton moghon.”

Ataam to tataghon Yesu

(Mt 16:24-28; Lu 9:23-27)

³⁴ Ghero Yesu ipoi ival tiina tinim tilup di toman taghoniina toni, ve isaav padi: “Ighaze tamtohton eta lolo pa inim leg, ve itaghton ataam tiou, ye irau itatan tau, imbaad ai pambaroon toni,† ve inim itaghton ghou. *Mt 10:37+*

³⁵ Pasa, tamtohton to ighaze ikaal ataam pa tau leso ineep poia izi taan, ye pale ilale. Ve ighaze tamtohton eta lolo ee moghon, ve ipul tau payou ve uraat to varu poia, nene pale igham nepoon poia ila to Maaron. *Lu 17:33; Yo 12:25*

† **8:34:** Ai pambaroon toit, nene patanani naol naol to tambaad di pasa, tataghon Yesu.

³⁶ Ighaze tamtoghon eta igham mbeb popoiadi tisor to taan tinim le, eemoghon tau anunu ilale, nene pale mbeb naol tonowen tiuuli vena? Maau.

³⁷ Pale tamtoghon tonenen igham sa mbeb ve irabolin anunu pani? Maau kat.” *Mbo 49:7+*

³⁸ “Tamtoghon to aazne, yes samsamiadi kat. Tipul muridi pa Maaron tinimale liva to ipul azuwa ve igham tamoot paghu. Ighaze tiam eta maya payou ve saveen tiou, ve ipesamun ghou ila yes tonene matadi, nene pale sawa to Tamtoghon Natu imuul inim toman anjela toni patabuanja, ve ipatoon Tama Maaron nguruba ve tapiri ivot ighazon, ye pale ipesamun tamtoghon tonenen iza paam.” *Mt 10:33; Ro 1:16; 2Tim 2:12*

9

Yesu ipatoon nguruba ivot ighazon
(*Mt 17:1-13; Lu 9:28-36*)

¹ Yesu isaav padi muul ighaze: “You nasaav payam kat. Tamtoghon pida to itinja tayondyood, pale timaat sone, ve tighita Maaron ipatoon pooz toni ivot ighazon toman tapiri tiina.”* *Mt 16:28; Lu 9:27*

² Mbon liim ve eez inim ila, ghoru Yesu igham Petrus, Yakobus, ve Yoan, ve yes paan moghon tizala lolooz eez to daba izala kat. Leso engendi tineep. ³ Tinepneep tonowe, ve Yesu nagho itoora

* **9:1:** Ngara katindi tighaze Yesu isavia sawa to yesja taghoniinja toni tol tizala lolooz, ve ipatoon nguruba ivot ighazon. Ve ngara pida tighaze ye isavia sawa to Pentekos ve inim. Pasa, sawa tonenen, uraat to votiaan varu poia ilaan toman tapiri tiina.

ila yes tol matadi. Ve nonogiina toni paam, ipisoon kat ve isul tiina. Tamtoghon eta to taan irau igham uli ipisoon kat tovene ne maau. ⁴ Tinepneep ve tighita Ilia yesuru Mose tivot ve tisavsav toman Yesu.

⁵ Tovenen Petrus imundig ve isaav ila pa Yesu ighaze: “Patoŋaan, taneep sualen le poiawaat kat. Vena, pale nirei mbeez tol? Eez payom, eez pa Mose, ve eez pa Ilia?” ⁶ Alina tonene, ye igham ngar pooi ve isavia ne maau. Isaav sorok. Pasa, toman ndita ru timatughez kat. ⁷ Mala maau ve yaghur tae izi le ikau di. Ghoru tiloon Maaron alina ivot ila yaghur tae tonowen lolo ighaze: “Nanan you taug Natug to lolog pani kat. Aloon alina ve ataghoni!” *Igham 40:34+; Mt 3:17; 2Pe 1:17+*

⁸ Rikia moghon taghoniina toni matadi ines, ve tighita tamtoghon eta muul maau. Yesu enjeni moghon.

⁹ Yes tipul lolooz, ve sawa to tilaghlaagh tizila, Yesu ingalsekin di ariana ighaze mbeb to tighita izala lolooz, tivotia pa tamtoghon rikia malep. Ineep todi moghon, le sawa to Tamtoghon Natu imundig pa mateen, ghoru tisavia. ¹⁰ Tovenen mbeb tonenen ineep to taudi moghon. Eemoghon tigham ngar naol pa saveen to Yesu isavia pa mateen toni tighaze: “Saveen tonene, pughu vena?”

Taghoniina to Yesu tighasoni pa mulaan to propet Ilia
(Mt 17:10-13)

¹¹ Ghoru taghoniina toni tighasoni tighaze: “Pughu vena to yes ngara to tutuun tighaze propet

Ilia pale imuul inim muun, ghoru Mesia tau inim?”
Mal 4:5; Mt 11:14

¹²⁻¹³ Yesu ipamuul ghasoniin todi ighaze: “Saveen todi tonenen, nene denja. Ilia pale inim muun, ve igharaat mulin mbeb tisob to tisami. Ve you nasaav payam. Ilia, ye inim wa.†

Ve matamim ingal ngar to tamtoghon tigham pani. Yes tighur patanani naol pani irau taudi lolodi itaghon saveen mungina to ineep pataghaan wa. Ve ighaze venen, pale vena pa Maaron aliya to timbooda injarua Tamtoghon Natu? Saveen tonenen isaav tovene: Ye pale imbaad patanani naol, ve yabyabuun tiina ighami itaghon Maaron ngar toni, ve tamtoghon tivelegi ve tizuruni.” *Mbo 22:1+; Is 53:3; Lu 1:17*

*Yesu indii avuvu samia pa pain kainanjen eez
 (Mt 17:14-21; Lu 9:37-42)*

¹⁴ Yesu toman taghoniina toni tol tonenen timuul tila tivot to nditadi pida, ve tighita ival tiina tiluvut di. Ndiran ngara pida to tutuun tineep toman di paam, ve yesya tiwazoran di pa savsaveen. ¹⁵ Ival tiina tonowen tighita Yesu, le tisob rujadi iza, ve rikia moghon tilaan tinjarua tila, ve tighami toman lolodi poia. ¹⁶ Yesu ighason di ighaze: “Yamja ndiran tonene awazoran gham pa sa?”

¹⁷ Ngeu eez to ineep ila ival tiina tonenen lolodi, ipamuul ghasoniin to Yesu ighaze: “Patojaan, avuvu samia izeev natug tonene, ve ighami avo ivool. Tauto naghami inim tiom, leso uuli. ¹⁸ Sawa

† **9:12-13:** Yesu isavia Yoan ngeu rughuzaanja. Pasa, uraat pida to Yoan, nene raraate inimale uraat to muun Ilia ighami.

isob to avuvu samia imundig pani, ipiyaava izila taan, ve livo kikikia, mbeera izizi, ve tua ikatooton paam. Tovenen naghason taghoniina tiom naghaze tindiir avuvu samia tonene ighau pani. Eemoghon titoova, le tiraua maau.”

¹⁹ Yesu iloon saveen tonene, ve isaav padi ighaze: “Oyai, yam tamtoghon to aazne, aghur ila maau kat. Itina takaria nepoon wa. Tovenen naghaze pa ngar tiam ivot ris ve aghilaal. Eemoghon maau. Moghon moghon, yam aghamgham patanani payou. Pale neez o ateg izi? Poia, agham pain kainaen inim.” ²⁰ Tovenen tighami ila toni. Sawa to avuvu samia tonenen ighita Yesu, rikia moghon imundig pa pain kainaen le itap izi taan, ve itatambul toman tua ikatooton, ve mbeera izi. ²¹ Tovenen Yesu ighason tama ighaze: “Patanani tonene ighami ris wa, ma ngaramus ne?”

Tama ipamuul aliina ighaze: “Sawa to ye kainaen ve inim, mbeb tonene ighamghami. ²² Mbeb tonene, poia maau. Ighaze le iwaghamuni kat. Sawa naol, ighami itaptap izala yab. Ve sawa pida, ighami itap izila ya lolu. Tovenen ighaze yom uraua, ghoru lolom isamin ghei, ve uul ghei.”

²³ Yesu isaav pani ighaze: “Wai, pughu vena to yom usaav ughaze: ‘Ighaze yom uraua, uul ghei.’ Nene ineep ila ghurla tiom moghon. Tamtoghon to ighaze ighur ila, mbeb eta irau ila muri maau.” *Mk 11:23; Yo 11:40*

²⁴ Tovenen pain kainaen tama rikia moghon ve itan roran Yesu ighaze: “You naghur ila.

Eemoghon ghurla tiou, nene iraua maau. Uul ghou lak!”

²⁵ Yesu ighita ival tiina tilaan tinjarua di tinim, tovenen iyaan avuvu samia tonenen, ve indiira ighaze: “Yom to uwaghamun pain kainanjen tonene, ve avo ve taliņa ivool, you nasaav payom: Upuli ve ughau ula! Uzeeva muul malep.” ²⁶ Ye isaav tovene, ve avuvu samia iyak sami, ve iwatoktokin pain kainanjen le itap izi taan. Ghoru ipuli, ve ighau. Sawa to ipuli, pain kainanjen mata iborboor, ve iwamatmaat. Tovenen ival tiina tighita ve tighaze: “Waii, imaat ghora wa!” ²⁷ Eemoghon Yesu ikis nima, ve iiti imundig iyoon.

²⁸ Ghoru Yesu imuul ila pa ruum. Yesna taghoniņa toni moghon tinepneep, ve tighasoni tighaze: “Pughu vena to yei irau nindiir avuvu samia tonowen maau?”

²⁹ Yesu ipamuul ghasoniņj todi ighaze: “Tasuņ, ghoru irau tandiir mbeb tovene. Ataam ite paam maau.”

*Yesu isaav muul pa mateeņ ve mundigiņj toni
(Mt 17:22-23; Lu 9:43-45)*

³⁰⁻³¹ Yesu toman taghoniņa toni tipul ndug tonowen, ve tilaagh inimale yongaņ, ve timbut taan suruvu to Galilaia. Yesu lolo pa tamtoghon tiwatag laghoņj todi malep. Pasa, ye ighaze ipatoot taghoniņa toni moghon pa ngar to pale ivot pani. Ye isaav padi ighaze: “Tamtoghon Natu, pale tighuri ila koia nimadi, leso tirabi imaat. Eemoghon mboņj inim tol, ye pale imundig pa mateeņ.” ³² Taghoniņa toni tilooņ saveeņ tonene, ve tikankaan pa pughu. Eemoghon timatughez pa ghasoniņj Yesu.

Sei to iza tiina kat?
(Mt 18:1-5; Lu 9:46-48)

³³ Yes tilaagh tila tivot Kapernaum ve tiloonj tila ruum lolo, ghoru Yesu ighason taghoniinja toni ighaze: “Laak, sawa to talaghlaagh taghon ataam tanim, yam awasavon gham pa sa?” ³⁴ Yes neenejadi moghon. Pasa, tiwasavon di pa sei todi to iza tiina ilib padi tisob. ³⁵ Tovenen Yesu mbole izi, ve ipoi taghoniinja toni saangul ve ru tinim, ve isaav padi ighaze: “Tamtoghon to ighaze iza inim tiina ilib pa ndita tisob, ye irau itatan tau iza izi kat inimale yes to ledi izadi maau, ve imbees pa tamtoghon tisob.” *Mt 20:26+, 23:11; Mk 10:43+*

³⁶ Ghoru Yesu igham pain kainaŋen eez, ipayoonda iyoon ila lolodi, ve iiti iza imbaada. Ghoru isaav pa taghoniinja toni muul: ³⁷ “Ighaze tamtoghon eta mata ingal ghou, ve igham pain kainaŋen eta tovene, ve iuuli pa you izag, nene ye igham ghou paam. Ve ighaze tamtoghon eta igham ghou, ye igham ghou moghon maau. Igham Tamaŋ Maaron to imbaaŋ ghou nanim ne paam.” *Mt 10:40; Yo 13:20*

Tamtoghon to ighaze ighur koi pait maau, ye inim itaad ite
(Lu 9:49-50)

³⁸ Yoan imundig ve isaav pa Yesu ighaze: “Patonjaan, yei nighita ngeu eez indirndiir avuvu sam-samiadi ila yom izam. Eemoghon ye itaghon ghiit pa lupuuŋ to it tonene maau. Tovenen yei niŋgalsekini nighaze igham tovene malep.”

³⁹ Eemoghon Yesu isaav padi ighaze: “Ai, yam agham vene malep! Pasa, ighaze ngeu eta igham mbeb gharatoonja tiina eta pa you izag, nene ye

irau rikia moghon itoor aliņa muul, ve isavia saveņ samia payou ne maau. *1Kor 12:3*

⁴⁰ Alooņ. Tamtoghon to ighaze ighur koi pait maau, ye inim itaad ite, ve irau iuul ghiit. *Mt 12:30; Lu 11:23*

⁴¹ Onoon kat, you nasaav payam: Ighaze tamtoghon eta mata iņgal ighaze yam tamtoghon to Kriši, ve igham amim ya rita ila rubruub pa ghunuņ, nene Maaron irau lolo imaagh pani maau. Ye pale igham le atia poia.” *Mt 10:42*

*Tagham nditaad titap pa ghurla todi malep
(Mt 18:6-9; Lu 17:1-2)*

⁴² Yesu isaav muul ighaze: “Ndipain to tighur inim tiou ne, ighaze tamtoghon eta iwat todi eta, ve ighami itap pa ghurla toni, ye ikaria tau wa. Tamtoghon tovene, poia pa timbit yaam tiina ila lua, ve tipandalini izila te lolo ve ilale.

⁴³⁻⁴⁴ “Ighaze nimam eez igheghereb ghom pa ghamuņ soso, nene poia pa umbut motini, ve upiyaava ilale. Onoon, yom pale unum narape. Eemoghon muri, yom pale ulooņ ula ndug sambam, ve uneep matam iyaryaar. Ve ighaze nimam rugharu tineep, nene pale unoknok ghamuņ soso, ve sawa to Mboņ Muri, ghoru tipiyaav ghom uzila ndug samia to yab ighanghan pani irau sawa isob. Yab tonowen, irau imaat maau. *Mt 5:30*

⁴⁵⁻⁴⁶ “Ve ighaze aghem eez igheghereb ghom pa ghamuņ soso, nene poia pa umbut motini, ve upiyaava ilale. Onoon, yom pale unum narape. Eemoghon muri, yom pale ulooņ ula ndug sambam, ve uneep matam iyaryaar. Ve ighaze aghem rugharu tineep, nene pale unoknok ghamuņ

sosor, ve sawa to Mboŋ Muri, ghoru tipiyaav ghom uzila ndug samia to yab ighanghan pani irau sawa isob.

⁴⁷ “Ve matam tovene paam. Ighaze matam dige eta igheghereb ghom pa ghamuun sosor, nene poia pa upeii ve upiyaava ilale. Onoon, yom pale matam atulu ee moghon. Eemoghon muri, yom pale ulooŋ ula uneep Maaron ndug toni. Ve ighaze matam rugharu tineep, nene pale unoknok ghamuun sosor, ve sawa to Mboŋ Muri, ghoru tipiyaav ghom uzila ndug samia to yab ighanghan pani.

Mt 5:29

⁴⁸ Motmoot to ndug tonowen timatmaat maau. Tighanghan tamtoghon irau sawa isob. Ve yab to ndug tonowen tovene paam. Irau tirabi imaata maau. Ighanghan irau sawa isob.

Is 66:24

⁴⁹ “Yes to watoonrau tighurghur te izala watoonrau pogho, leso ingalaan ila Maaron mata. Le isob, ghoru yab ighani. Ngar tovene pale ivot pa tamtoghon tisob.†

Ezek 43:24

⁵⁰ “Te nene mbeb poia. Eemoghon ighaze tapiri isob, ve itete muul maau, pale tagharaata vena? Maau. Yam irau anim te poia, ve apatoonŋ ngar luuma to Maaron pa tamtoghon. Leso yamŋa awalupun gham anim ee moghon, ve aneep pooi.”§

Mt 5:13; Lu 14:34+; Ro 12:18

† **9:49:** Muunŋ, Maaron isaav pa yes Israela ighaze tighur te (o sol) izala watoonrau todi inim ghilalooŋ pa saveen mbuaanŋ toni (Wok Pris 2:13). Yab inim ghilalooŋ pa: 1) atia to Maaron pale ighuri pa tamtoghon pa Mboŋ Muri, 2) uraat to Avuvu Patabuanŋ, ve 3) pataŋani naol to titoov ghurla toit ve tigham ghiit tagharaata tauud, leso tanŋalaanŋ ila Maaron mata. § **9:50:** Paesiinŋ to saveenŋ waaro tonene ineep ila Mt 5:13.

10

Saveen to rabuun motin vaiuun (Mt 19:1-12; Lu 16:18)

¹ Yesu imundig muul, ipul ndug tonowen, ve ilaagh ila ivot taan suruvu to Yudea to ineep ila ya Yordan paṇa ite. Inepneep tonowe, ve ival tiina tikeet tila toni muul. Tovenen ye ipatoot di muul pa Maaron aliṇa itaghon ṅgar to moghon moghon ighamghami.

² Ndiran tutuunṇa pida tila toni tighaze titoova. Tovenen tighasoni tighaze: “Vena? Ighaze tamoot eta irab motin vaiuun toni, ve izurun azuwa, nene denja pa tutuun toit, ma maau?”

³ Yesu ighason di ighaze: “Tutuun to Mose ighuri payam, isaav vena?”

⁴ Yes tipamuul aliṇa tighaze: “Mose iyok pa nditamoot tirab motin vaiuun todi. Eemoghon tamoot eta ighaze izurun azuwa, ye irau imbood azuwa le rau eta inim paesiin. Leso ipaghazonan di ighaze vaiuun todi isob wa. Ghoru izuruni ila.”
Lo 24:1+; Mt 5:31

⁵ Yesu isaav padi muul ighaze: “Saveen tiam tonenen, nene onoon. Ve Mose imbood tutuun tovene payam pasa, ṅgar samia iyaryaan kat ila lolomim. ⁶Eemoghon muun kat, sawa to Maaron ighur sambam ve taan, ye ighur tamtoghon. Ighur tamoot ve liva.
Mbnp 1:27, 5:2

⁷ Pughu tonene to tamoot eta ighaze ivai, ye pale ipul tama ve tina, ve yesuru azuwa tilup di tinim ee moghon.
Mbnp 2:24; Ep 5:31

⁸ Muun, yesuru tineep ledi ledi. Ve sawa to tivai, tinim tamtoghon ee moghon. Tovenen yesuru

irau tineep ledi ledi muul maau. Pasa, tilup di tinim ee moghon wa. ⁹ Ve yes to Maaron tau ilup di tinim ee moghon, tamtoghon eta irau ivalag di muul maau.”

¹⁰ Yesu toman taghoniina toni timuul tila ruum, ghorro tighasoni muul pa saveen tonenen. ¹¹ Yesu isaav padi tovene: “Ighaze tamoot eta irab motin vaiuun toni ve ivai liva paghu, ye imalaan pa tutuun to vaiuun, ve igham sosor pa azuwa mungina. ¹² Ve liva tovene paam. Ighaze irab motin vaiuun toni, ve ivai tamoot paghu, ye imalaan pa tutuun to vaiuun.” *Mt 5:32; 1Kor 7:10+*

Yesu ipalot ndipain

(Mt 19:13-15; Lu 18:15-17)

¹³ Tamtoghon tighamgham ndinatudi geegeu tila to Yesu, lesu ighur nima izala poghodi ve ipalot di. Eemoghon taghoniina toni tighita di, ve tiyaan di. ¹⁴ Yesu ighita ngar to tighami, le irau lolo maau. Tovenen isaav padi ighaze: “Ai, yam apoon ataam pa ndipain malep. Apul di tinim tiou. Pasa, pooz to Maaron toman ndug toni, nene to yes to ngar todi inimale ndipain geegeu tonene.* *1Kor 14:20; 1Pe 2:2*

¹⁵ You nasaav payam kat: Ighaze tamtoghon eta itaghon pooz to Maaron ngara inimale ndipain geegeu tonene maau, ye pale irau iloon ila ndug toni ne maau.” *Mt 18:3*

* **10:14:** N dipain geegeu tinumeer nditamandi ve nditinandi ve tineep ila sambadi. Iit paam irau tanumeer Maaron ve taneep ila ye samba. Leso tataghon pooz toni, ve muri taloon tala ndug sambam.

16 Yesu isavsaav le isob, ghoru igham ndipain tonowen, imbaad di, ve nima izala poghodi, ve ighur poia to Maaron iza todi.

*Mbaliin tau eez isavsaav toman Yesu
(Mt 19:16-30; Lu 18:18-30)*

17 Yesu ighaze ipamundigin laghoon toni muul. Eemoghon ngeu eez ilaan inarua ila, iput aghe izi Yesu nagho, ve ighasoni ighaze: “Patonjaan, yom poiam. Pale naghama vena, lesu naghama nepoon poia ila to Maaron, ve naneep matag iyaryaar le alok?”

Mban 16:30

18 Yesu ipamuul ghasoniin toni ighaze: “Pughu vena to yom ughaze you poiag? Maaron moghon to poia. Ite paam maau. 19 Tutuun to naol ne, yom uwatag di wa: ‘Urab tamtoghon imaat malep, ughur maat malep, uyub malep, upariaan saveen kaarom malep, uwatombanon tamtoghon ve uyub mbep todi malep, ve matam lonlonainja pa tamam ve tinam, ve utandag padi.’ ”

Igham 20:12+; Lo 5:16+; Ro 13:9

20 Ngeu tonowen iloon saveen tonene, ve isaav pa Yesu muul ighaze: “Wai, Patonjaan, sawa to you pain ghou ve inim aazne, you nataghon tutuun tonenen tisob.”

21 Yesu ighita ngeu tonenen le lolo pani. Tovenen isaav pani muul ighaze: “Poia. Ve ngar eez to yom ughami sone. Ula ugholia mbep tiom tisob, ve urei yaama pa yes mbolaanja, lesu ugham lem mbaliin tau izi ndug sambam. Le isob, ghoru unum utaghon ghou.”

Mban 2:45, 4:32+; 1Tim 6:17+

²² Ngeu tonenen iloonj saveenj tonene, ve imundig, ipul Yesu, ve ila toman lolo ipatajan. Pasa, ye mbaliinj tau kat.

²³ Ghoru Yesu itoora, mata ila pa taghoniinja toni, ve isaav padi ighaze: “Yes mbaliinj taudi, ipatajan padi kat pa titaghon pooz to Maaron ve tiloonj tila ndug toni.”

Mk 4:19; 1Tim 6:9+

²⁴ Taghoniinja toni tiloonj saveenj tonene le rujadi iza. Tovenen Yesu isaav padi muul ighaze: “Wais ndipain tiou, aloonj. Ipatajan kat pa tamtoghon titaghon pooz to Maaron ve tiloonj tila ndug toni!

²⁵ Aghita. Ighaze kamel eta itoova pa izeev tau iloonj ila sarum saambu, pale iraua wa? Maau. Yes mbaliinj taudi tovene paam. Ighaze taudi titoova pa titaghon pooz to Maaron ve tiloonj tila ndug toni, nene pale tiraua maau.”

²⁶ Taghoniinja toni tiloonj saveenj tonene le rujadi iza ve ngar todi isob. Tovenen tighasoni tighaze: “Wai, ighaze venen, sei to pale Maaron igham mulini ve ineep pooi?”

²⁷ Yesu mata ila padi, ve isaav padi tovene: “Ighaze tamtoghon taudi titoova, nene pale tiraua maau. Eemoghon Maaron, mbeb eta ila muri maau. Tovenen ighaze ye igham mulin di, nene pale tineep pooi.”

²⁸ Yesu isaav tovene, ve Petrus ipamuul aliija ighaze: “Ughita. Yei tonene nipul mbeb tiei tisob tizi tineep, ve ninim nitaghon ghom.”

²⁹ Yesu ipamuul aliija ighaze: “Onoon kat, you nasaav payam. Ighaze tamtoghon eta igham ngar payou toman varu poia, ve ipul ruum toni, tonjetaz toni, tina tama, ndinatu, ma uum toni,

³⁰ nene pale poia tiina to Maaron iza toni le iyat mulin mbeb tisob to tamtoghon tonenen ipul di, irau tamoot liim (100). Pasa, sawa tonene to ye ineep izi taan, Maaron pale igham le ruum, tonvetaz, ndinatu, nditina, ve uum katindi. Eemoghon tamtoghon pale tighur patanjani pa tamtoghon tonenen paam pasa, ye itaghon ghou ve ivovotia varug. Ve sawa to Mbonj Muri ighaze ivot, ye pale ineep mata iyaryaar le alok.

³¹ “Eemoghon tamtoghon katindi to aazne timuḡmuuḡ, nene pale tizi tineep muri kat. Ve yes to aazne tineep muri kat, nene pale anadi tila timuuḡ.”

Mt 20:16; Lu 13:30

*Yesu isaav muul pa mateenḡ ve mundigiḡḡ toni
(Mt 20:17-19; Lu 18:31-34)*

³² Yesu toman taghoniḡḡa toni tilaagh taghon ataam to izala pa Yerusalem. Yesu imuḡḡ, ve yes titaghoni. Taghoniḡḡa toni ḡgar todi iwaghamgham. Ve yes to tilaagh toman di, matughezaanḡ igham di. Yesu igham taghoniḡḡa toni saanḡul ve ru tila sagan, ghoru isaav padi muul pa mbeb to pale ivot pani. ³³ Ighaze: “Alooḡ. Iit taghaze tala pa Yerusalem tonene. Tala tavot, pale tighur Tamtoghon Natu ila daba to watoonḡrau toman yes ḡgara to tutuuḡ nimadi itaghon Maaron ḡgar toni. Ve yes pale tipayoonda pa savsaveenḡ, ve tighur atia pani tighaze ye pale imaat. Ghoru tighuri ila yes to Yuda maau ne nimadi. ³⁴ Ve anadi tipamogherani, tivuragi, ve tilosi pa waar mata mata, ghoru tirabi imaat. Eemoghon mbonḡ inim tol, ye pale imundig pa mateenḡ.”

Yakobus ve Yoan tighaze tinim tintina
(Mt 20:20-28)

³⁵ Yesu isavia mateenᵅ toni le isob, ghoru Zebedi ndinatu ru, Yakobus ve Yoan, tila tigharau Yesu, ve tisaav pani tighaze: “Patoᵅaaᵅ, mbeb eez to yeru lolomai pani kat. Tovenen nighaze nighason ghom pani. Irau ughami payei?”

³⁶ Tovenen Yesu ighason di ighaze: “Yamru ag-haze you naghama sa payam?”

³⁷ Yesuru tipamuul aliᵅa tighaze: “Yei nighaze muri, sawa to uneep toman ᵅgurubam tiina izi ndug sambam, ghoru ugham ghei nineep ila digem. Eez ineep ila pa nimam waan, ve ite ineep ila pa nimam ᵅas.”

³⁸ Yesu ipamuul aliᵅadi ighaze: “Mbeb to aghason ghou pani, yamru awatag pataᵅani toni maau. Aghita. Rubruub† to you pale naghun ila ne, yamru irau aghun ila paam? Ve pataᵅani tiina to pale igham ghou, yamru irau aghami paam?” *Mk 14:36; Lu 12:50*

³⁹ Yesuru tipamuul aliᵅa tighaze: “Vee, yeru irau nighun ila.”

Tovenen Yesu isaav padi muul ighaze: “Onoon, rubruub to you pale naghun ila, yamru pale aghun ila paam. Ve pataᵅani to pale igham ghou, nene pale igham yamru paam. *Mbaᵅ 12:2; Pil 3:10; Syg 1:9*

⁴⁰ Eemoghon mbeb to yamru aghason ghou pani ne, you nanᵅini maau. Nene ineep to Tamaᵅ Maaron. Sei to pale ineep ila pa nimag waan, ve

† **10:38:** Rubruub to Yesu isavia, nene iza to yabyabuᵅ to ye pale imbaada, leso ireu sosor to tamtoghon ve itatan mbalmbali to Maaron.

sei to pale ineep ila pa nimag n̄as, nene ye tau ighur di pataghaan wa.”

⁴¹ Nditadi saangul tiloon Jakobus yesuru Yoan saveen todi, le irau lolodi maau. ⁴² Tovenen Yesu ipoi di tinim, ve isaav padi ighaze: “Ngar to ndug ndug to Yuda maau ne, yam awatagi wa. Yes daba to tingin di, tipapait taudi izadi, ve titatan yes to tineep ila sambadi. Ve tamtoghon todi pida to izadi tintina, yes titaghon ngar raraate moghon. Sawa naol, tipatoon tapiridi pa yes to tineep ila sambadi, ve titatan di. *Lu 22:25+*

⁴³ Eemoghon ngar tovene ineep tiam malep. Ighaze tamtoghon tiam eta lolo pa imuun payam, ve iza inim tiina ila lolomim, nene ye irau itatan tau iza, ve inim mbesoonja payam. *Mt 23:11; Mk 9:35; Lu 9:48*

⁴⁴ Ve ighaze tiam eta lolo pa imuun pa yam asob, nene ye irau itatan tau iza izi kat, ve inim mbesoonja sorok pa yam asob. *1Pe*

5:3

⁴⁵ Leso itaghon Tamtoghon Natu ngar toni. Pasa, ye inim pa tamtoghon timbees pani ne maau. Ye inim inimale mbesoonja pa iuul tamtoghon, ve ipul tau imaat pa ival tiina. Leso ighol atia to sosor todi, ve ipas di tivot pa samia tapiri.” *Yo 13:14; Pil 2:7; 1Tim 2:5+*

Yesu igharaat mata pisi eez igharau Yeriko, iza Bartimeus

(Mt 20:29-34; Lu 18:35-43)

⁴⁶ Yesu toman taghoniinja toni tila tivot ndug Yeriko. Ghoru tisakia laghoon todi muul, ve yesna ival tiina tipul ndug, ve tilaagh tila le tivot to ngeu mata pisi eez, iza Bartimeus. Ye Timai natu. Mbole

izi ataam dige, ve isun̄sun̄ tamtoghon pa le mbeb. ⁴⁷ Ye iloon̄ tighaze n̄geu to inim ne, ye Yesu to Nasaret. Tovenen imboob aliña tiina ighaze: “Aa Yesu, David Natu, lolom ghora, isamin ghou ve uul ghou lak!”

⁴⁸ Tamtoghon katindi tiloon̄a, ve tiyaana tighaze neneñ̄a. Eemoghon maau. Ye itañ roran Yesu muul toman aliña tiina kat ighaze: “O David Natu, lolom isamin ghou ve uul ghou lak!”

⁴⁹ Tovenen Yesu iyoon, ve isaav ila pa tamtoghon pida ighaze: “Asaav pani inim o.”

Tovenen tipoi mata pisi tonowen tighaze: “Ai, lolom poia, ve umundig. Pasa, ye ipoi ghom ighaze ula toni.” ⁵⁰ N̄geu tonenen itir nonogiiña to moñ̄eñ̄añ̄ izi ineep, ve imundig ve ila to Yesu. ⁵¹ Ila ivot toni, ghoru Yesu ighasoni ighaze: “Yom ughaze nagh̄am vena payom?”

Mata pisi tonenen ipamuul aliña ighaze: “Aa mos tau, you naghaze yom ugharaat matag. Leso naghita ndug.”

⁵² Tovenen Yesu isaav pani ighaze: “Ula lak! Ghurla tiom, tauto iuul ghom ve matam poia wa.” Rikia moghon n̄geu tonenen mata poia ve ighita ndug. Ghoru itaghon Yesu ve yes̄ña tilaagh taghon ataam tila. *Mt 9:22; Mk 5:34*

11

Yesu izala pa Yerusalem

(Mt 21:1-11; Lu 19:28-40; Yo 12:12-19)

¹ Yesu toman taghoniña toni tilaagh tila le tigharau Yerusalem, ve tivot ndug ru, Betpage ve Betania, to tineep ila lolooz Oliv dige. ² Ghoru Yesu imbaañ taghoniña toni ru ighaze: “Yamru

amuun azala ndug tonowen. Ala avot, pale aghita esele paghu eez to timbiti iyondyood. Ngeu eta mbole izala pogho pa eta sone. Apoola, ve aghami izi inim. ³ Ighaze tamtoghon eta ighason gham ighaze: ‘Pughu vena to yamru agham tovene?’ ghoru asaav pani aghaze: ‘Tiina tiei le uraat pani. Ye pale rikia moghon ve ighami imuul inim.’”

⁴ Tovenen yesuru timuun tila tivot ndug tonowen, ve tighita esele paghu eez iyondyood. Esele tonowen, timbiti ila ataam dige igharau ataam to ruum eez. Yesuru tipoola, ⁵ ve tamtoghon pida to tiyondyood tonowe tighason di tighaze: “Ai, yamru agham sa? Pughu vena to apool sorokin esele tonanan?”

⁶ Yesuru tipamuul alinadi inimale Yesu isaav padi. Ghoru ndiran tonowen tiyokia esele padi, ⁷ ve yesuru tighami, ve timuul tizila to Yesu. Tila tivot toni, ghoru tiduduum nonogiina todi to monenjan tizi, tizavar di tizala esele pogho, ve Yesu izala mbole izi. ⁸ Ghoru ival tiina to tilaagh toman di, tizavar nonogiina todi to monenjan taghon ataam pa tipakuri. Ve tamtoghon pida tila timbut mbef inimale napatolo mbila taghon ataam dige, ve tigham di tinim tisuruuv di taghon ataam paam. ⁹ Ve tamtoghon pida timuun pa Yesu, ve pida tilaagh muri, ve tipaiti toman alinadi tiina tighaze:

“Hosana!”

Ngeu tonene inim pa Ngeu Tiina iza.

* **11:9:** ‘Hosana,’ nene saveen waaro eez to yes Israela. Pughu tovene: ‘ugham mulin’ o ‘uul.’ Ighaze tilool ve tipait ngeu eta iza, nene pale titem pa saveen tonene.

Poia to Maaron pale iza toni ve ipaloti! *Mbo 118:25+*

¹⁰ Tamtoghon to aazne inim ne, pale inim kinik, ve igham pooz inimale muuŋ timbuud David ighami.

Poia to Maaron pale iza toni ve ipaloti.

Hosana! Tapait Maaron to ineep sala le sala kat ne iza!”

¹¹ Yesu ila ivot Yerusalem, ghoru ilooŋ ila sirsiir to Rumai Tiina lolo. Iyondyood tonowe, ve mata ines pa mbeb, ve ighita ŋgar naol to tighamgham di ila rumai lolo. Eemoghon igharau pa mboŋ izi. Tovenen yesŋa taghoniinŋa toni saanŋul ve ru tipul Yerusalem, ve timuul tila pa ndug Betania.

Yesu isaav ve ai fik igorgor

(Mt 21:18-19)

¹² Mboŋ ndugizau, ghoru Yesu toman taghoniinŋa toni timundig ve tipul ndug Betania, ve tighaze timuul tila pa Yerusalem. Tilaghlaagh taghon ataam tila, ve Yesu iyamaan tau pitoola.

¹³ Mata ila le ighita ai fik eez iyoon sagan. Tovenen ilaagh ŋarua ila ighaze igham anoŋa pida ve ighan. Eemoghon ila le ighita ai tonowen anoŋa eta maau. Raua moghon. Pasa, sawa tonenen, nene sawa to ai fik anoŋadi sone. ¹⁴Tovenen isaav pa ai tonenen ighaze: “Aazne ve ila, yom pale ughur anoŋam eta muul pa tamtoghon tighani ne maau.” *Lu 13:6*

Yesu isavia saveeŋ tonene, ve taghoniinŋa toni tilooŋa paam.

Yesu izurun tamtoghon to raukoliinŋ tighau pa Rumai Tiina

(Mt 21:12-17; Lu 19:45-48; Yo 2:13-22)

15 Yesu toman taghoniina toni tila tivot Yerusalem, ghero Yesu iloon ila sirsiir to Rumai Tiina lolo, le ighita tamtoghon to tiraauraukol izi tonowe. Tovenen izurun di tighau tivot tila pumuri. Ye ipakud ton to yes ndiran to paraboliin yaam, toman watiin to yes to tiraauraukol pa man mbaluuz, le mbef todi isob imalin izila taan. 16 Ve yes to timbadbaad mbef todi, ve tilala tinimnim ila sirsiir to Rumai Tiina lolo, ye ingalsekin di ighaze tigham tovene muul malep. 17 Ghero ipatoot di pa Maaron aliina ighaze: “Yam awatag maau? Maaron aliina to timbooda, isaav ighaze: ‘Pale tiwaat rumai tiou tighaze nene sunuun ina to ndug tisob.’ Eemoghon yam aghami inim ndug to yubyubna tiyonuon ila.” *Is 56:7; Yer 7:11*

18 Yes daba to watoonrau toman yes ngara to tutuun tiloon saveen tonene, ve timundig ve tikaal ataam pa tirab Yesu imaat. Pasa, ival tiina rujadi iza pa saveen toni ve titaghoni wa. Tovenen yes daba timatughez pani.

19 Rabrab izi, ghero Yesu toman taghoniina toni tipul Yerusalem, ve timuul tila pa ndug todi to ghenoon.

Ghurla toit, tapiri tiina
(Mt 21:20-22)

20 Ndugizau, ghero Yesu toman taghoniina toni timundig ve tilaagh taghon ataam muul tila. Tila le tighita ai fik to Yesu isavia saveen patanani injarua, nene igorgor izala to duba, ve izila waria paam. 21 Tovenen Petrus mata ingal Yesu aliina, ve isaav pani ighaze: “Patonaan, ughita! Ai fik to

noor usavia saveen patanani inarua, tauto igorgor wa!”

²²⁻²³ Yesu ipamuul Petrus aliņa, ve isaav padi ighaze: “Yam irau aghur ila to Maaron. You nasaav payam kat: Ighaze tamtoghon eta isaav pa lolooz tonene ighaze: ‘Umundig, ve upiyaav taum ula te.’ Ve ighaze lolo ru maau, ve ighur ila ighaze saveen toni pale ighur anoņa, nene pale Maaron igham mbeb tonenen ivot. *Mt 17:20; Lu 17:6*

²⁴ Tovenen you nasaav payam. Ighaze yam asuņ Maaron pa mbeb eta, ve aghur ila aghaze ye pale igham mbeb tonenen ivot, ye pale ighami ivot payam. *Yo 14:13; Yems 1:5+*

²⁵ “Ighaze ayoon pa suņuuņ, ve matamim kisin sosor to tamtoghon eta, yam irau apul sosor toni. Leso Tamamim Maaron to ineep izi sambam ireu sosor tiam paam. *Mt 5:23, 6:14+; Kol 3:13*

²⁶ [Eemoghon ighaze yam apul sosor to nditamim maau, nene pale sosor tiam paam, Tamamim Maaron to ineep sambam we ireua maau.]”

Yes daba tighason Yesu pa sei to ighuri pa uraat toni

(Mt 21:23-27; Lu 20:1-8)

²⁷ Yesu toman taghoniņa toni tila tivot Yerusalem muul, ve Yesu ilooņ ila sirsiir to Rumai Tiina lolo, ve ilaghaagh tonowe. Yes daba to watoonrau toman ņgara pida to tutuuņ ve pooza pida tilup di ve tila tivot toni, ve tighasoni tighaze:

²⁸ “Laak, uraat to ughamghami ne, yom izam pani vena? Ve sei kat to ighur ghom pa uraat tonene?” *Yo 2:18; Mban 4:7*

²⁹ Yesu ipamuul aliņadi ighaze: “Ghasoniņ tiam poia. Eemoghon you leg ghasoniņ eez payam

paam. Ighaze yam apamuul ghasoniin tiou, nene pale you napamuul tiam paam, ve navotia pughu to you izag pa uraat tiou. ³⁰ Yo, asaav payou. Yoan to muun irurughuuz tamtoghon, uraat toni pughu vena? Ye itaghon n̄gar to ndug sambam, ma itaghon n̄gar to tamtoghon?”

³¹ Yes tipamuul aliŋa rikia maau. Tiwasavon di tighaze: “Wai, pale tasaav vena? Ighaze tasaav taghaze: ‘Yoan itaghon n̄gar to ndug sambam,’ ye pale isaav pait: ‘Ighaze venen, pughu vena to yam aghur ila saveen toni maau?’ ³²⁻³³ Ve ighaze tasaav taghaze: ‘Yoan itaghon n̄gar to tamtoghon,’ pale poia?” Tisaav tovene pasa, tamtoghon tisob tighur ila tighaze Yoan ye propet tau. Tovenen yes timatughez, ve tipamuul ghasoniin to Yesu tighaze: “Ii, yei nikankaan pani.”

Tauto Yesu ana isaav padi: “Ighaze venen, you paam, irau napamuul ghasoniin tiam, ve navotia pughu to izag pa uraat tiou tonene maau.”

12

Saveen palelaan to uraata samsamiadi to tinjin uum vaen

(Mt 21:33-46; Lu 20:9-19)

¹ Yesu isaav muul pa yes daba to yes Yuda ila saveen palelaan ighaze: “Sawa eez, n̄geu eez igharaat taan toni ve ivazog vaen ila.*

Ghoro ikau sirsiir iluvuti, ve itai saambu eez inim ndug to pison̄ vaen. Ve irei mbeez aghe mala. Leso yes uraata tineep izala, ve matadi izila pa uum vaen ve tinjini. Ye igharaat mbeb le isob,

* **12:1:** Paesiin to saveen waaro tonene ineep ila Mt 21:33.

ghoro ipul uum vaen toni ila uraata pida nimadi. Leso tigham uraat pani, ve sawa to youn vaen anoŋa, ghoru tivalagi, ve pida inim vaen tau a, ve pida inim yes adi. Ye igharaat saveeŋ toman di le isob, ghoru imundig, ipul ndug toni, ve ila ineep mala izi ndug ite. *Mbo 80:8+; Is 5:1+*

² “Ineep tonowe le sawa to youn vaen anoŋa ivot, ghoru imbaaŋ mbesooŋa toni eez ila to yes uraata tonowen. Leso inŋig di, ve igham vaen anoŋa pida to tighuri pa uum tau. ³ Eemoghon sawa to mbesooŋa tonowen ila peria todi, tikisi ve tilosi. Ghoru tizuruni toman nima ŋginiŋa, ve imuul ila. ⁴ Tovenen uum tau imbaaŋ mbesooŋa toni ite ila. Eemoghon ye paam, tirabi izala daba, ve tipamayanini ⁵ Tovenen uum tau imbaaŋ mbesooŋa toni ite inim tol ana ila. Ye ila ivot todi, ve tirabi imaat. Ve mbesooŋa toni pida, tovene paam. Tirab pida le naghodi isami, ve pida, tirab di timatmaat.

⁶ “Mbesooŋa toni tisob titoova le maau, ve ŋgeu ee moghon to inepneep. Nene ye tau natu to ye lolo pani kat. Tovenen uum tau imbaaŋ natu tonowen ila. Pasa, igham ŋgar tovene: ‘Ighaze taug natug ila, nene pale tiroron pani ve tilooŋ aliŋa.’ ⁷ Eemoghon sawa to yes uraata tonenen tighita natu ilaghlaagh sagan inarua di inim, tiwasavon di tighaze: ‘Ou, aghita. Nowe tiina toit natu, tauto ilaagh inim we. Muri, ye pale igham uum tonene toman mbeb tisob to tama. Tala tarabi imaat. Leso tagham mbeb naol tonene tinim leed.’ *Mt 27:18*

⁸ Tovenen tila tikisi, ve tirabi imaat. Ghoru tisur paatu iza, ve tila tipiyaava ila pumuri.” *Hib 13:12*

⁹ Yesu isavia saveeñ tonene le isob, ghero ighason di ighaze: “Yam agham ñgar vena? Pale uum vaen tau igham vena pa yes uraata tonowen? Ye pale inim, ve irab di tisob timatmaat, ve ighur uum vaen toni ila ndiran pida nimadi, lesó tingin poiani.” *Mbarj 13:46, 28:28*

¹⁰ Ghero Yesu isaav padi muul ighaze: “Maaron aliña waaro eez to timbooda, yam awaata, ma maau? Saveeñ tonenen isaav ighaze:

‘Yaam to yes to rein ruum matadi velegini, ve tipiyaava ilale, tauto inim pughu pa ruum ve ipaloti. Leso ruum iyoon ariaña izala pogho.

¹¹ Maaron tau igham ñgar tonene ivot.

Ve yei nighita inimale mbeb gharatoona eez ila matamai.’ ” *Mbo 118:22+*

¹² Yes daba tiloon saveeñ palelaañ tonene, ve tighilal tighaze Yesu isavia saveeñ tonene ñarua di. Tovenen tighaze tikisi pataghaañ. Eemoghon timatughez pa ival tiina, tauto tipuli ineep, ve tighau tila.

Ghasoniin to piyavoon takes ila pa kinik tiina to Rom

(Mt 22:15-22; Lu 20:20-26)

¹³ Muri ghero, daba to yes Yuda timbaañ ndiran tutuuna toman Erod tamtoghon toni pida tila to Yesu. Yes tighaze titombaana pa savsaveeñ. Ighaze ipiyaav aliña eta isosor, ghero inim pughu pa tipayoonda pa savsaveeñ. ¹⁴ Tovenen tila tivot toni, ve tigham saveeñ ñgoreeñ pani tighaze: “Patonjaañ, yei niwatag: Yom ñgeu to saveeñ onoon moghon. Ighaze tamtoghon izadi tintina, ma ledi izadi maau, yom ugham ñgar pa mbeb tovene

maau. Usasavia ngar raraate moghon pa tamtoghon tisob, ve usavsav ghazoonja ila matadi. Ve ighaze upatoonj tamtoghon pa ataam to Maaron, saveenj tiom isob, nene onoon moghon. Tovenen usaav ghazoonja payei. Ighaze iit Yuda tapiyaav takes ila pa kinik tiina to Rom, pale denja pa tutuunj toit, ma maau? Tapiyaav, ma ineep?”

¹⁵ Eemoghon Yesu iwataag kaarom todi wa. Tovenen isaav padi ighaze: “Pughu vena to yam aghaze atoov ghou? Yaam to tapiyaava pa takes ne, agham eta inim naghita.” ¹⁶ Tovenen tigham yaam denari eez ila toni, ve ighason di ighaze: “Laak, sei anunu ve iza tonene?”

Yes tipamuul ghasoniinj toni tighaze: “Nanan kinik tiina to Rom.”

¹⁷ Yesu isaav padi muul tovene: “Tau tonene. Ighaze mbeb to kinik tiina to Rom, ghoru aghami imuul ila to tau. Ve mbeb to Maaron, yam apamuula ila to Maaron.”†

Yes tiloonj saveenj toni tonene, le runjadi iza pani.
Mbnp 1:27; Ro 13:7; 1Pe 2:17

*Ghasoniinj pa mundigiinj to yes mateenja
(Mt 22:23-33; Lu 20:27-40)*

¹⁸⁻¹⁹ Yes Sadusi, tisavsav tighaze mateenja irau timundig maau. Tovenen Sadusi pida tinjarua Yesu tila, ve tighasoni tighaze: “Patonjaan, muunj Mose imbood tutuunj pait tovene: Ighaze ngeu eta ivai, ve yesuru azuwa ledi natudi eta maau, ve tamoot imaat, nene tazi eta irau ivai naar toni. Leso liva ipoop, ve natudi tonenen igham tama olman to

† **12:17:** Paesiinj to saveenj waaro tonene ineep ila Mt 22:21.

imaat ne ina, ve iyoon pa mbeb toni. *Lo 25:5;*
Mbanj 23:8

²⁰“Laak, sawa eez, tonjvetaz liim ve ru tinepneep. Ngeu aidaba ivai, eemoghon le natu maau, ve imaat. ²¹Tovenen tazi to itaghoni, ye igham naar tonowen ve ivaii. Eemoghon tazi tonowen paam, le natu maau, ve imaat. Ghoru tazidi ite to inim tol padi, njar raraate ivot pani. Le natu maau, ve imaat. ²²Tighamgham tovene le yes liim ve ru tivai liva ee moghon tonenen, ve tisob timaat. Ve ledi ndinatudi maau. Muri ghoru, naar tonenen paam, ana imaat. ²³Laak, sawa to Maaron ighaze ipamundigin yes mateeja, nene pale liva tonowen inim sei kat azuwa? Pasa, yes liim ve ru, to tisob tivaii.”

²⁴Yesu ipamuul alinjadi ighaze: “Oyai, yam tonene awatag Maaron tapiri ve saveeñ toni rita maau. Tauto njar tiam iwaghamgham. ²⁵Sawa to Mboñ Muri ve Maaron ighaze ipamundigin yes mateeja, nene pale tamtoghon tivai muul maau. Nepoonj todi pale inimale yes añela to tineep izi sambam. *1Kor 15:42-53*

²⁶⁻²⁷Yo, you naghaze naghason gham pa mundigiinj to yes mateeja. Vena, saveeñ waaro eez to Mose imbooda, isavia sawa to Maaron ivot toni inimale yab ighanghan ila ai kainañen duba. Yam awaat saveeñ tonenen, ma maau? Sawa tonenen, Maaron isaav pani ighaze:

‘You Maaron to Abaraam, Maaron to Isak, ve
 Maaron to Yakop.’ *Igham 3:6*

“Maaron, ye Maaron to yes mateeja maau. Ye Maaron to yes to tineep matadi iyaryaar. Tovenen

ngar tiam iyel kat.”†

Tutuunj sine to tiina kat ilib pa tutuunj tisob?
(Mt 22:34-40; Lu 10:25-28)

²⁸ Ngeu ngara eez to tutuunj inim ve iloonj Yesu toman yes Sadusi tiwazoran di pa savsaveenj. Ye iloonj saveenj to Yesu, ve ighita ighaze Yesu ipamuul saveenj todi kat. Tovenen ye ana ighason Yesu ighaze: “Tutuunj sine to tiina kat ilib pa tutuunj tisob?”

²⁹ Yesu ipamuul ghasoniinj toni ighaze: “Tutuunj to tiina kat ilib pa tutuunj tisob, nene vene:

‘O yam Israela aloonj! Tiina toit Maaron, ye moghon to Maaron tau. *Lo 6:4+*

³⁰ Tovenen lolom pa Tiina tiom Maaron. Ughur lolom toman ngar tiom ve tapirim isob ila pani.’ *Lo 10:12+*

³¹ “Ve tutuunj tiina ite to inim ru pani, nene vene: ‘Lolom pa tamtoghon ve ugham poian di inimale lolom pa taum.’ *Wkp 19:18*

Tutuunj eta ilib pa tutuunj ru tonene maau.” *Ga 5:14; Yems 2:8*

³² Ngeu tonowen iloonj saveenj tonene, ve isaav pa Yesu ighaze: “Patoŋaanj, saveenj tiom, nene denja kat. Saveenj to usavia, nene onoon moghon. Pasa, Ngeu Tiina moghon to Maaron tau. Maaron ite paam maau. *Lo 4:35,39*

³³ Tovenen ighaze iit taghur lolood toman ngar toit ve tapiriid isob ila pani, ve taghur lolood pa tamtoghon ve tagham poian di inimale lolood pa tauud, nene mbeb tiina kat. Ilib pa mbeb tisob

† **12:26-27:** Paesiinj to saveenj waaro tonene ineep ila Mt 22:32.

to taghur di izala artaal leso yab ighan suvun di, toman watoonrau pida to taghamgham di.” *Mbo 40:6-8, 51:16-17; Mt 9:13*

³⁴ Yesu ighita ighaze ngeu tonenen ipamuul saveen toman ngar poia. Tovenen isaav pani ighaze: “Yom uneep mala pa pooz to Maaron maau.” Sawa tonenen ve ila, tamtoghon tighason Yesu pa saveen eta muul maau. Pasa, timatughez pa saveen toni.

Ighaze Mesia ivot ila siŋ to kinik David, pale iza irau ilib pa David vena?

(Mt 22:41-46; Lu 20:41-44)

³⁵ Yesu ipatoot tamtoghon pa Maaron aliŋa ila sirsiir to Rumai Tiina lolo, ve ighason di ighaze: “Laak, pughu vena to yes ngara to tutuun tighaze Mesia pale ivot ila siŋ to kinik David? Pasa, muun Avuvu Patabuan ipamundigin David, ve isaav ighaze:

³⁶ ‘Maaron isaav pa Tiina tiou ighaze: “Unum mbolem izi ila pa nimag waan, le irau natatan koiamna ve tapiridi isob kat, ve uvazag di ila aghem samba.” ’ *Mbo 110:1; Mban 2:34+; 1Kor 15:25; Hib 1:13*

³⁷ “Aghita. David tau iwaat Mesia ighaze ‘tiina toni.’ Eemoghon Mesia, ye siŋ to David. Mbeb tonene, ngara vena?”§

Ival tiina to tilonloon Yesu saveen toni, tinidi iza ve lolodi poiawaat kat.

Yesu iveivei pa tamtoghon pa ngar pakuruun to yes ngara to tutuun

(Mt 23:1-36; Lu 20:45-47)

§ 12:37: Paesiin to saveen waaro tonene ineep ila Mt 22:45.

³⁸ Yesu ipatoot tamtoghon pa Maaron aliņa, ve isaav padi ighaze: “Apatum gham pa yes ngara to tutuun! Yes tighaze tindud di pa nonogiņa mamala, ve tilaghlaagh taghon maran ate. Leso tamtoghon tighita di ve tipait di. ³⁹ Ve ighaze tiloon tila rumai, ma tila pa ghanghaniin, yes tighaze le tineep ila watiin popoiadi to tighur di pa yes to izadi tintina. ⁴⁰ Yes tiwatombanon yes ndinaara ve tigham ruum todi toman mbep todi to naol ne tinim ledi. Ve tiyotyoot sunuun todi le mala kat. Leso tamtoghon tighita di tighaze yes ndiran patabuaņa. Tovenen atia to muri pale iza todi, nene tiina le tiina kat.”

*Yesu ipait naar eez pa paitoon toni to ighuri
(Lu 21:1-4)*

⁴¹ Yesu mbole izi ila Rumai Tiina nagho igharau ndug to tamtoghon tighurghur paitoon todi ila,* ve imbatut ival tiina to tilala pa tighur paitoon todi. Mbaliin taudi katindi tila, ve tighur yaam tintina ila. ⁴² Mala maau liva mbolaņa eez, ye naar, ana ila ighur yaam kaviaaņa gegegeu ru tila. ⁴³ Yesu ighita mbep tonenen, ve ipoi taghoniņa toni tinim, ve isaav padi ighaze: “You nasaav payam kat. Naar tonowen, ye liva mbolaņa. Eemoghon yaam to ye ighuri we, nene ilib pa yaam to ival tisob tighuri. ⁴⁴ Pasa, yes tisob ledi yaam tiina inepneep, ve tighur ngiira moghon. Ve naar tonowen, mbolaņ ighami. Eemoghon yaam

* **12:41:** Yes Yuda tigharaat mbep inim makau ndoonņa malmala saangul ve tol (13), ve tipayoon di ila Rumai Tiina nagho, lesu tamtoghon tighur paitoon todi iloon ila.

toni ris to ingini pa nepoon toni, tauto ighuri isob
ila.” *2Kor 8:1+,12*

13

*Yesu isaav pa rewaan Rumai Tiina to Yerusalem
(Mt 24:1-2; Lu 21:5-6)*

¹ Yesu ipul Rumai Tiina, ve ivot ila pumuri, ghero taghoniina toni eez isaav pani ighaze: “Patonaan, ughita. Tirei katin rumai tonowen pa yaam tintina to ngeretunadi popoia kat! Ve ruum pida to tiyoon tigharau we paam, paghunadi kat.”

² Eemoghon Yesu isaav pani ighaze: “Ughita ruum tintina tonowen? You nasaav payom: Muri pale tireu mbirisan di tisob tizi. Irau tipul yaam eta ineep izala yaam ite pogho muul maau.” *Lu 19:44*

*Patanani naol pale tivot muun, ghero tireu Rumai Tiina izi
(Mt 10:17-22, 24:3-14; Lu 21:7-19)*

³ Yes tilaagh tizala lolooz Oliv, ghero Yesu mbole izi tonowen, ve mata ila pa Rumai Tiina to iyondyood we. Petrus, Yakobus, Yoan, ve Andreas tila toni, ve yes moghon tineep tomani, ghero tisaav pani tighaze: ⁴“Usaav ghazoonja payei. Saveen to usavia pa rewaan Rumai Tiina, pale neez o mbeb tonenen ivot? Ve ighaze sawa to mbeb tonenen igharau, pale sa mbeb inim ghilaloon pani?”

⁵ Yesu isaav padi ighaze: “Apatum gham. Pa vene, tamtoghon eta iweu gham, ve apul ataam tiou. *Ep 4:14; 2Tes 2:1+; 1Yo 4:1*

⁶ Pasa, muri tamtoghon naol pale tinim ve tiwaat sorokin izag, ve tighaze: ‘Ngeu to yam asananani, nene taug tonene.’ Ve tamtoghon katindi pale

tighur ila kaarom todi tonowen, ve tipul ataam tiou. *Mbanj 5:36+; 1Yo 2:18*

⁷ “Ighaze yam aloonj malmal tintina varudi, ma aloonj saveenj yaghur tighaze malmal tintina pale tivot, yam asañenj malep. Pasa, mbef tovene pale tivot itaghon Maaron ngar toni. Eemoghon taan sawa, nene sone. ⁸ Tovenen ndug tintina pale tigham malmal pa ndug tintina pida. Ve kinik pida pale tigham malmal pa kinik to ndug pida. Ve yonjyoog pale itok taan, ve pitool ivot izi ndug pida. Patañani naol tonenen, nene tinimale yabyabuunj to ndiliva tiyamaana muunj, ghoru tipoop.*

Tamtoghon pale tighur patañani pa yes to titaghon Yesu

⁹ “Apatum gham. Pasa, yes Yuda pale tipayoon gham pa savsaveenj ila daba todi matadi, ve tilos gham iloonj ila rumai todi. *Mbanj 4:1+, 5:17+, 22:30+*

Ve ndug ndug to tighur koi payou, pale tipayoon gham paam pa savsaveenj ila yes daba to taan ve kinik matadi. Pasa, yam ataghon ghou. Mbef to ivot payam pa sawa tonenen, nene pale inim ataam payam pa avotia varug ve apariaanj saveenj tiou ila yes pooza tonowen matadi. *Mbanj 16:19, 25:23+*

¹⁰ Ve varu poia, pale tivotia irau ndug tisob itaghon Maaron ngar toni. Le isob, ghoru taan sawa ivot.

* **13:8:** Yes Yuda tighur ila tighaze: Patañani naol pale tivot muunj itaghon Maaron ngar toni, ghoru Mesia inim ve igham nepoonj poia ivot.

¹¹ “Ighaze tikis gham ve tighur gham ila yes daba nimadi pa savsaveen, yam lolomim imbumbu, ve akaal ngar ve savsaveen pa asavia padi malep. Sawa to tipayoon gham pa savsaveen, sa ngar to ighaze ivot payam, yam asavia moghon. Pasa, Maaron tau pale ipatoon gham pa sa saveen to ye ighaze yam asavia. Tovenen yam pale asaav itaghon taumim ngar tiam maau. Avuvu Patabuan tau pale ivotia alija ila yam avomim. *Mt 10:19-20; Lu 12:11+*

¹² “Sawa tonenen ighaze ivot, tamtoghon pale tighur tonvetaz todi ila yes daba nimadi, lesa tirab di timaat. Ve ndolman pale tigham ngar raraate moghon pa ndinatudi. Ve ndipain pale tighur koi pa nditamandi ve nditinandi paam, ve tighur di tila yes daba nimadi, lesa tirab di timaat. ¹³ Ival tisob pale tighur koi payam. Pasa, yam avotia you izag, ve ataghon ghau. Eemoghon tamtoghon to ighaze iyoona ariana ve ikis ghurla toni tunja le irau sawa toni isob, nene pale Maaron igham mulini ve ineep pooli.” *Yo 15:18,20; Syg 2:7,11, 3:5*

*Patajani tiina kat pale ivot pa Yerusalem
(Mt 24:15-28; Lu 21:20-24)*

¹⁴ Yesu isaav muul ighaze: “Muri, yam pale aghita tamtoghon tipayoon mbeb samia kat iloon ila ndug patabuan pa tiwaghamuni. Ndug tonowen, mbeb tovene irau iloon ila maau. Eemoghon pale tipayoonda iza iyoona tonowen, ghoru tipul ndug tonowen ineep. (Yom sei to uwaat saveen tonene, ugham ngar pani pooli.) Ighaze mbeb tonenen ivot, tamtoghon to tineep

izi taan suruvu to Yudea, yes irau rikia moghon tighau tizala pa lolooz. *Dan 9:27, 11:31, 12:11*

¹⁵ Tovenen ighaze ngeu eta ineep ila ndug to nepoon to ruum pogho we,[†]

nene irau imuul izila ruum lolo ve igham mbeb toni eta ne maau. Izi ve ighau malmali ila. *Lu 17:31*

¹⁶ Ve ighaze tamtoghon eta ighamgham uraat ila uum, ve patanani tonenen ivot, ye paam. Irau imuul ila igham nonogiina to monenaañ maau. Ighau malmali ila. ¹⁷ Sawa tonenen ighaze ivot, ndiliva to apodi, ve yes payamyamna, tikaria taudi wa. Pasa, tipatanan pa ghaon. ¹⁸ Tovenen yam asuñ Maaron. Leso ighur patanani tonenen ila sawa to ndug yauña sob, ve ighur soso payam pa aghau. ¹⁹ Pasa, patanani to sawa tonenen, pale tiina le tiina kat. Sawa to Maaron ighur sambam ve taan ve inim aazne, patanani tovene ivot pa eta sone. Ve muri paam, irau ivot muul maau. *Dan 12:1; Yoel 2:2*

²⁰ Ighaze Maaron ingoor sawa to patanani tonenen tuku maau, nene irau tamtoghon eta ineep maau. Tisob tilaledi. Eemoghon ye igham ngar pa yes to ye tau isia di tinim le ne. Tauto ingoor sawa tonenen inim tuku wa.

²¹ “Sawa tonenen, ighaze tamtoghon eta isaav payam ighaze: ‘Aghita. Mesia tau tonene!’ ma isaav ighaze: ‘Ye ineep nowel!’ yam aghur ila saveen toni malep. *2Tes 2:1+*

²² Pasa, ndiran kaaromna pale timundig, ve pida titoom tighaze yes Mesia. Ve pida pale titoom

[†] **13:15:** Yes Yuda, ruum todi poghodi babanadi. Tovenen tirourou tonowe inimale iit tarourou ila patar.

tighaze yes propeta to tivotia Maaron aliŋa. Ve yes pale tigham mbeb gharatoonjadi toman ghilaloon pida tivot paam. Leso tiweu tamtoghon ve tipul ataam to Maaron. Yes to Maaron isia di tinim le ne paam. Ndiran kaaromŋa tonowen pale titoova pa tiweu di, lesa tipul ataam to Maaron. *Lo 13:1+; 2Tes 2:9+; Syg 13:13*

²³ “Aloon. Mbeb naol tonene tivot sone, ve you nasavia di payam pataghaan. Tovenen apatum gham.

Mulaan to Tamtoghon Natu
(*Mt 24:29-31; Lu 21:25-28*)

²⁴ “Ighaze patanani to sawa tonenen tivotaar le isob, nene pale ndag ighaaz muul maau, ve ndug ndoroom. Ve kaiyo paam, pale ighaaz muul maau.

²⁵ Pitum to sambam paronania pale tipul inadi, ve titaptap tizi. Ve Maaron pale iwatokin mbeb pida to sambam paronania to tapiridi tintina ne le tirur. ²⁶ Ghoru tamtoghon matadi izala, ve tighita Tamtoghon Natu ineep ila yaghur tae lolo, ve izi inim toman tapiri ve ŋguruba tiina kat. *Dan 7:13; 1Tes 4:16+; Syg 1:7*

²⁷ Ve ye pale imbaan aŋela toni tila tirau taan dige paan. Leso tiyou yes to ye isia di tinim le, ve tigham di tila toni. Pale tila pa rag pughu, daudau pughu, yavaar pughu, ve kagu pughu.”

Saveen palelaan to ai fik
(*Mt 24:32-35; Lu 21:29-33*)

²⁸ Ghoru Yesu isaav padi muul ighaze: “Agham ŋgar pa ai fik. Ighaze boga mbiti, ve sududu papaghu tipeet tiza, ghoru aghilaal aghaze sawa to ndag ighaze ivot. ²⁹ Mbeb to you nasavia di

payam ne, ngara raraate moghon. Ighaze yam aghita mbeb naol tonene tivotvot, ghoru awatag aghaze: Sawa to Tamtoghon Natu mullaṅ toni, nene inim igharau wa, inimale tamtoghon to iyoon ila ataam avo. ³⁰ You nasaav payam kat: Yes to sawa tonene pale timaat sone, ve tighita mbeb tonowen tisob tivotaar. ³¹ Sambam paronṅania ve taan pale tilaledi. Eemoghon saveṅ tiou waaro eta irau ilale ne maau.” *Mbo 102:25+, 119:89; Mt 5:18*

Sawa kat to Tamtoghon Natu mullaṅ toni, nene tamtoghon eta iwatagi maau (Mt 24:36-44; Lu 12:40)

³² Yesu isaav muul ighaze: “Sawa kat to Tamtoghon Natu mullaṅ toni, nene tamtoghon eta iwatagi maau, aṅela to tineep izi sambam we tiwatagi maau, ve Natu paam, iwatagi maau. Tama Maaron moghon, to iwatagi. *Mbaṅ 1:7; 1Tes 5:1+*

Tapamaat ariṅa ve tagham uraat to Maaron ighuri inim nimaad

³³ “Tovenen apatum gham ve apamaat ariṅa. Pasa, sawa tonenen, yam awatagi maau. ³⁴ Pale ivot inimale nṅeu eez to ighaze imundig ve ila pa ndug mala. Tovenen ighur uraat irau mbesooṅa toni, ve ipul ruum toman mbeb toni pida ila nimadi, leso tiṅgin di. Ve isaav pa mbesooṅa toni to iṅgin ataam ne ighaze ighur mata pani ve isanṅani. Ighur uraat padi le isob, ghoru ipul di, ve ila. *Mt 25:14; Lu 12:35+*

³⁵ “Tovenen you nasaav payam. Apamaat ariṅa. Pasa, sawa kat to ruum tau mullaṅ toni, yam awatagi maau. Pale ilat pa rabrab kat, ma

mboŋ anona, ma ndug itun, ma mboŋmaagh kat, nene yam awatagi maau. ³⁶ Tovenen yam apamaat ariana. Pa vene, aghengheen, ve ye ilat ve ikarmotin gham. ³⁷ Tovenen saveeŋ to you nasavia payam, nene ila pa ival tisob paam: Apamaat ariana.”

14

Yes daba to Yuda tikaal ataam pa tirab Yesu imaat

(Mt 26:1-5; Lu 22:1-2; Yo 11:45-53)

¹ Mboŋ ru isob, ghoru tiza pa sawa to Pasova* toman lupuuŋ tiina to yes Yuda to tilup di pa sunuuŋ ve tighan mberet to le yis maau ne. Yes daba to watoonrau toman yes ngara to tutuuŋ tighaze tirab Yesu imaat. Tovenen tilup di, ve tikaal ataam pa tikisi inimale yongaan. ² Tisaav tighaze: “Iit irau takisi pa sawa to lupuuŋ tiina tonene maau. Pa vene, tareu ival tiina lolodi, ve tipamundigin malmal.” *Mbo 2:1-3*

Liva eez ilin ngoreeŋ to vuzi poia ne izala Yesu daba

(Mt 26:6-13; Yo 12:1-8)

³ Ngeu eez to ndug Betania, iza Simon. Ye, muuŋ kolekole ighami. Yesu toman taghoniina toni tila ruum toni, ve mboledi izi pa ghanghaniin, ve liva eez igham ngoreeŋ apatu paghuna eez to ngoreeŋ ineep ila, ve inim. Ngoreeŋ tonowen, vuzi poia, ve atia tiina kat. Tigharaata pa mbeb to tiwaat iza

* **14:1:** Pasova, nene lupuuŋ tiina to yes Yuda to matadi ingal muul ila pa sawa to nditimbudi tineep sami izi Isip, ve Maaron igham mulin di ila yes Isipa nimadi.

tighaze ‘nard.’ Ye igham ngoreen apatu tonowen, ve isen polin avo,†
ghoro iliŋi izala Yesu daba.

⁴ Tamtoghon todi pida tighita ngar to liva tonowen ighami, le irau lolodi maau. Tovenen tiyou avodi pa liva tonenen tighaze: “Wai, ye iwaghamun ngoreen tonowen pasa?” ⁵ Mbeb tonowen, atia tiina kat. Inimale tagholia, tone tagham yaam tiina kat irau 300 denari ma venen, leso tauul yes mbolaŋa pani!” Tovenen tiyaan liva tonenen.

⁶ Eemoghon Yesu isaav padi ighaze: “Ayou avomim pani pasa? Apuli ineep. Ngar to ye igham payou ne, nene paghuna. ⁷ Yes mbolaŋa pale yamŋa anepneep irau sawa isob. Tovenen sawa sine to yam aghaze auul di, nene irau auul di. Eemoghon you, mala maau pale napul gham, ve irau naneep toman gham muul maau. ⁸ Ngar to liva tonene irau igham payou, tauto ighami wa. Ngoreen to ye iliŋi izala poghog, nene inimale ye igharaat ghou pataghaan pa mateen tiou. *Yo 19:40*

⁹ Tovenen you nasaav payam kat: Muri, tamtoghon pale tila tivotia varu poia irau taan isob. Ve ndug sine to tivotia varu poia padi, nene pale tisavia ngar to liva tonene igham payou. Leso tamtoghon matadi kisini.”

Yudas ighaze ye pale ighur Yesu ila koia nimadi (Mt 26:14-16; Lu 22:3-6)

¹⁰ Taghoniŋa to Yesu saangul ve ru, todi eez, iza Yudas Iskariot. Sawa tonenen, ye ila to yes daba to

† **14:3:** Ngoreen apatu to liva tonene, avo mala. Tauto ye isen polin avo.

watoonrau, ve isaav padi ighaze ye pale ighur Yesu ila nimadi. ¹¹ Yes tiloon saveen toni, le lolodi poia kat, ve yesna timbua saveen tighaze pale tigham le yaam pida. Timbua saveen le isob, ghoru Yudas ila ve isanjan. Ighaze soso poia eta ivot, ghoru ighur Yesu ila nimadi.

*Taghoniina to Yesu tila tigharaat aniin to Pasova
(Mt 26:17-19; Lu 22:7-13)*

¹² Tinepneep le ndag to tipamundigin lupuun tiina to ghaniin mberet to le yis maau ne ivot. Sawa tonenen, yes Yuda tirabrab sipsip ndinatu pa ghanghaniin to Pasova. Tovenen taghoniina toni tighason Yesu tighaze: “Tiina, yom ughaze nila nigharaat aniin to Pasova payom izi sine?”
Igham 12:6+

¹³ Tovenen Yesu imbaan taghoniina toni ru tila, ve isaav padi ighaze: “Yamru aloon ala Yerusalem, ghoru aghita ngeu eez imbaad ya ila uur, ve ilaagh inarua gham ilat. ¹⁴ Matamim kisini ve ataghoni. Ruum sine to ighaze ye iloon ila, yamru ataghoni aloon ala, ve asaav pa ruum tau aghaze: ‘Patonaan to it ighason ghom ighaze: Ruum suruvu to yom ughuri pani ne ineep pa dige sine? Pasa, ye ighaze yesna taghoniina toni tilup di sualen pa ghanghaniin to Pasova.’

¹⁵ Ngeu tonenen pale ipatoon ruum suruvu tiina eez payam. Ineep sala. Ndug to nepoon ve ghanghaniin, nene tigharaata wa. Yamru agharaat aad aniin pataghaan tonowe.”

¹⁶ Yesu isavsaav padi le isob, ghoru taghoniina toni tonowen timundig ve tiloon tila Yerusalem,

ve tighita mbeb tisob tivot titaghon Yesu aliņa. Tovenen tigharaat aniin to Pasova tonowe.

Yesu yesņa taghoniņa toni tighan aniin to Pasova

(Mt 26:20-25; Lu 22:14-23; Yo 13:21-30)

¹⁷ Rabrab izi, ve Yesu yesņa taghoniņa toni saanġul ve ru tila tivot ruum tonowen, ve mboledi izi pa ghanghaniin to Pasova. ¹⁸ Yes tighanghan, ve Yesu isaav padi ighaze: “You nasaav payam kat. Yam tonene, tiam eez to aazne ighanghan toman ghoun ne, pale ighur ghoun nala koiagna nimadi.”

Mbo 41:9

¹⁹ Taghoniņa toni tiloon saveeņ tonene, le lolodi ipataņan. Tovenen yes enaęņa tisaav pani tighaze: “Wai, Tiina, pale naghām nġar tovene payom wa? You irau naghām tovene maau.”

²⁰ Yesu isaav padi muul ighaze: “Yam saanġul ve ru tonene, tiam eez to yeru nizeev mberet izila rubruub ee moghon, nene ye to pale igham nġar tonene. ²¹ Tovenen Tamtoghon Natu pale ila ve tirabi imaat itaghon saveeņa to timbooda pataghaaņ wa. Ve nġeu to pale ighuri ila koia nimadi, ye ikaria tau wa! Inimale tina ipoopa maau, tone poia!”

Yesu irei mberet ve vaen pa taghoniņa toni

(Mt 26:26-30; Lu 22:17-20; 1Kor 11:23-25)

²² Yes tighanghan, ve Yesu igham mberet ve ipait Maaron pani. Ghoru iteeva, ve ireii irau taghoniņa toni, ve isaav padi ighaze: “Aghami. Nene you mindag.” ²³ Ghoru igham rubruub vaen, ipait Maaron pani, ve izuzuuna ila todi, ve yes tisob tighun ila. Ve isaav padi ighaze: ²⁴ “Nene

siŋ tiou to pale imaliŋ pa tamtoĝhon katindi. Leso ipariaaŋ saveeŋ mbuaaŋ to ataam paghu to pale Maaron yesŋa tamtoĝhon tilup di tinim ee moghon. *Igham 24:8; 1Kor 10:16; Hib 8:8+, 9:16+*
²⁵ You nasaav payam kat: You pale naghun vaen muul maau, le irau sawa paghu ivot ve itiŋa talup ghiit muul izi sambam, ghoru naghun.”

²⁶ Tighangan le isob, ve timbou mbouŋ eez to tipait Maaron, ghoru tivot tila pumuri, ve tizala pa lolooz Oliv. *Mbo 118:29*

*Yesu isaav ighaze Petrus pale ipesamun iza
 (Mt 26:31-35; Lu 22:31-34; Yo 13:36-38)*

²⁷ Yesu yesŋa taghoniŋa toni tila tivot lolooz Oliv, ghoru isaav padi ighaze: “Mboŋ aazne, yam asob pale atap pa ghurla tiam, ve apul murimim payou. Pasa, Maaron aliŋa to timbooda, isaav ighaze:

‘You pale narab ŋginiŋa to sipsip, ve sipsip tiwaghaughau.’ *Sek 13:7; Yo 16:32*

²⁸ “Eemoghon muri, sawa to Tamaŋ Maaron ipamundigin ghou pa mateeŋ, you pale namuun nala nasaŋan gham izi Galilaia.”

²⁹ Petrus ilooŋ saveeŋ tonene, ve isaav ariana pa Yesu ighaze: “Nene yes pida. Ve you irau natap ve napul murig payom ne maau.”

³⁰ Yesu isaav pani ighaze: “Nes Petrus, you nasaav payom kat. Mboŋ aazne, yom pale upesamun izag pae tol le isob, ghoru tatareek itaŋ muul inim pae ru.”

³¹ Tovenen Petrus isaav ariana muul ighaze: “Sei isaav! Ighaze tirab ghou namaat toman ghom, nene poia. Tirab ghou lak! Eemoghon irau

napesamun izam maau.” Ve taghoniina toni tisob tisavia saveen raraate moghon.

Yesu isun izi Getsemane

(Mt 26:36-46; Lu 22:39-46)

³² Ghoro Yesu igham taghoniina toni, ve yesna tilaagh tila tivot ndug eez, iza Getsemane. Tila tivot tonowe, ve ye isaav padi ighaze: “Mbolemim izi sualen, ve you nala nasun tonowe.” ³³ Ghoro igham Petrus, Yakobus, ve Yoan, ve yesna tila sagan ris. Sawa tonenen, Yesu lolo ipatanan le ipatanan kat, ve igham ngar naol pa patanani to pale ivot pani. ³⁴ Tovenen isaav padi ighaze: “Oyai, lolog ipatanan kat le rismoghon tone namaat. Yam aneep sualen ve apamaat ariana.” *Yo 12:27*

³⁵ Ghoro ilaagh ila ris, iput aghe ve ighur nagho izila pa taan, ve ighason Maaron ighaze irau to ipaghau patanani tonenen pani, ma maau? Pasa, Yesu iwatag: Sawa to patanani iza toni, tauto ivot wa. ³⁶ Ve isaav ighaze: “Abba,† Tamañ, mbeb eta ila murim maau. You naghaze upaghau rubruub§ tonene payout. Eemoghon utaghon ngar tiou malep. Utaghon taum lolom.”

³⁷ Isun le isob, ghoro imuul ila to taghoniina toni tol tonenen, ve ighita di tighen. Tovenen isaav pa Petrus ighaze: “Simon, yom ugheen?”

† **14:36:** ‘Abba,’ nene Hibru alinadi waaro eez. Yes Israela ndinatudi geegeu tipoipoi nditamandi tighaze: ‘Abba,’ inimale iit ndinatuud tipoipoi nditamandi tighaze ‘Aman.’ § **14:36:** Rubruub to Yesu isavia, nene iza to yabyabuun to ye pale imbaada, leso ireu sosor to tamtooghon ve itatan mbalmbali to Maaron.

Irau upamaat ris maau? ³⁸ Yam apamaat ariana ve asuŋ. Pa vene, tovaan ivot payam, ve atap. Onoon, lolood taghaze le tataghon Maaron ngar toni. Eemoghon ngar to uliid iyaryaan ila lolood, tauto igham ghiit tapiriid iraua maau.” *Ro 7:23; Ga 5:17*

³⁹ Yesu isavsaav padi le isob, ghoru ipul di, ve ila isuŋ muul itaghon suŋuun to papazogi ighami. ⁴⁰ Isuŋ le isob, ghoru imuul ila to taghoniina toni, ve ighita di tighengheen sone. Pasa, matadi ighengheen kat. Tovenen ledi saveen eta to tisavia pani ne maau. ⁴¹ Yesu ila isuŋ muul inim pae tol, ghoru imuul ila, ve isaav padi ighaze: “Wai, atemim izi ve aghengheen sone? Iraua lak! Pasa, sawa to tighur Tamtoghon Natu ila ndiran sam-samia nimadi, tauto ivot wa. ⁴² Amundig ve tala. Aghita. Ngeu to ighaze ighur ghou nala koiagna nimadi, tauto inim peria wa!”

Tikis Yesu

(Mt 26:47-56; Lu 22:47-53; Yo 18:3-12)

⁴³ Yesu isavsaav sone, ve Yudas ighereb ival tiina a tinim peria. (Yudas, ye taghoniina saangul ve ru, todi eez.) Ival tiina tonowen, yes daba to wa-toonrau toman yes ngara to tutuun ve pooza pida to yes Yuda timbaan di tila. Yes tikis buza toman ndaab le irau di. ⁴⁴ Yudas igharaat saveen padi pataghaan ighaze: “Tala peria ve ighaze aghita nasavag ngeu eta ve nayanin pani, nene ye tau. Akisi, ndaaba tingin poiiani, ve aghami ala. You pale naghama ngar tovene inim ghilaloon payam, lesu aghilaal ngeu tonowen.”

⁴⁵ Tovenen sawa to tila tivot todi, Yudas rikia moghon inarua Yesu ila, ve isaav pani ighaze: “Aa

Patonjaan!” ve isavagi ve iyanin pani. ⁴⁶ Ghoru ival tiina tonenen tikis Yesu. ⁴⁷ Tovenen yes to tiyoon toman Yesu, todi eez ipas buza toni iza, ve isap motin ngeu eez taliņa. Ngeu tonowen, ye mbesoonja to daba to imuun pa yes to watoonrau.

⁴⁸ Ghoru Yesu isaav pa ival tiina tonenen ighaze: “Wai, pughu vena to alaagh toman buza ve ndaab, ve anim aghaze akis ghou? You ngeu to ghamuun malmal? ⁴⁹ Sawa naol, itiņa tanepneep izi Rumai Tiina nagho, ve napatoot gham pa Maaron aliņa. Yam akis ghou pataghaan tonowe maau? Poia. Akis ghou lak. Leso Maaron aliņa to timbooda pataghaan, anonja ivot.”

⁵⁰ Yesu isavia saveen tonene, ve taghoniņa toni tisob tipuli, ve tighau. *Mbo 88:8; Mk 14:27*

⁵¹ Ngeu paghu eez* itaghon Yesu ve yesņa tila tivot ndug tonowen. Ye ikawaal uli moghon. Yes ndaaba tighaze tikisi paam. ⁵² Eemoghon tigham sapirini, ve tikis uli toni moghon. Tovenen kambaņmbanjiņa, ve ilaan ighau ila.

Tipayoon Yesu pa savsaveen ila daba to yes Yuda matadi

(Mt 26:57-68; Lu 22:54-55,63-71; Yo 18:13-14,19-24)

⁵³ Yes tigham Yesu tila, ve tighuri iloon ila ruum to daba to imuun pa yes to watoonrau. Daba tisob to watoonrau, toman yes ngara to tutuun ve yes pooza tilup di tonowe ve tيسانan. ⁵⁴ Petrus ipas-pasi pooli, ve itaghon Yesu ila. Eemoghon ilaagh

* **14:51:** Ndiran ngara pida tighaze ngeu paghu to ighau ila, nene Markus to imbood varu poia tonene.

muri kat padi, pasa imatughez. Ye ilaagh riṅa riṅa tovene le ila peria sirsiiir to ruum tonenen. Ghoroo ilooṅ ila sirsiiir lolo, ve mbole izi toman uraata pida to daba to watoonṅrau ila yab dige, ve yab ilaava.

⁵⁵ Yes daba to watoonṅrau toman tamtoghon tisob to lupuunṅ tiina to tiṅgin yes Yuda, titoova pa tikaal tamtoghon pida, leso tipariaaṅ saveeṅ tighaze yes tighita Yesu igham sosor, ve inim pughu pa tirabi imaat. Eemoghon ṅgar todi ighur maau. ⁵⁶ Onoon, tamtoghon katindi tipariaaṅ saveeṅ kaarom tighaze yes tighita Yesu igham sosor. Eemoghon saveeṅ todi raraate maau. Tisavia saveeṅ mata naol.

Igham 20:16; Lo 19:15

⁵⁷ Ghoroo ndiran pida timundig, ve tiṅgal saveeṅ pani tighaze: ⁵⁸ “Yei nilooṅ ṅgeu tonene isaav ighaze: ‘Rumai Tiina to tamtoghon tireii pa nimadi, you pale nareua izi, ve napayoon rumai ite pa mboṅ tol moghon. Rumai tonowen, tamtoghon pale tireii pa nimadi maau.’ ” *Yo 2:19; Mbaṅ 6:14*

⁵⁹ Eemoghon yes paam, aliṅadi raraate maau. Saveeṅ todi mata naol.

⁶⁰ Tovenen daba to watoonṅrau imundig iyoon ila yes pooza tonenen matadi, ve isaav pa Yesu ighaze: “Ulooṅ wa? Yes tipariaaṅ saveeṅ tighaze tilooṅ ghom usavia saveeṅ tovene. Vena, irau upamuul saveeṅ todi, ma maau?” ⁶¹ Eemoghon Yesu isavia saveeṅ eta maau. Neneeṅa moghon. Tovenen daba to watoonṅrau ighasoni muul ighaze: “Usaav ghazooṅa payei lak. Yom Mesia? Maaron to tamtoghon tipaiti pa poia toni ne, Natu yom?” *Is 53:7*

⁶² Yesu ipamuul aliņa ighaze: “Vee! Taug tonene. Ve muri, yam pale aghita:

‘Tamtoghon Natu ineep ila ina to ghamuun pooz to ineep ila Maaron ariņa nima waan. Ve ye pale ineep ila yaghur tae to sambam, ve imuul izi inim.’ ” *Mbo 110:1; Dan 7:13; Syg 1:7*

⁶³ Daba to watoonrau iloon saveeņ tonene le irau lolo maau kat. Tovenen ireep nonogiņa toni, ve isaav ighaze: “Isob wa! Takaal tamtoghon ite paam pa ipariaaņ saveeņ muul pasa? ⁶⁴ Aazne, yam taumim alooņ katin saveeņ ila ye tau avo wa. Ye isavia saveeņ velegiņ pa Maaron. Laak, yam agham ņgar vena pani?”

Yes tisob tilup avodi, ve tisaav tighaze: “Ye isosor wa. Tamtoghon tovene irau ineep maau. Ye imaat.” *Wkp 24:16; Yo 19:7*

⁶⁵ Ghoro tamtoghon todi pida timundig ve tivuragi, tikau mata, tirabi, ve tipamogherani tighaze: “Yom propet, ne? Yo, uvotia Maaron aliņa payei!” Ghoro yes uraata pida to Rumai Tiina anadi tighami, ve tipambar paņa paam.

Petrus ipesamun Yesu iza

(Mt 26:69-75; Lu 22:56-62; Yo 18:15-18,25-27)

⁶⁶⁻⁶⁷ Sawa to yes daba tiloon saveeņ to Yesu, Petrus ineep sila igharau yab to titavuna ila sirsiir lolo, ve yab ilaava. Liva paghu eez to imbesm-bees pa daba to watoonrau, inim ve imbatut poian Petrus nagho, ve isaav ighaze: “Ai, yom tonene ulaghlaagh toman Yesu to Nasaret paam.”

⁶⁸ Eemoghon Petrus ipesam pa tau ighaze: “Wai, saveeņ to yom usavia ne, you nawatagi maau.

Nakankaan pani.” Ghoru ipul ina tonowen, ve induur ivot igharau sirsiir avo. Sawa tonenen, tatareek itañ. ⁶⁹ Liva mbesooña tonowen mata ila le ighita Petrus muul. Tovenen isaav pa yes to tiyondyood tigharai ighaze: “Ai, aghita! Ngeu tonene, ye todi eez paam.” ⁷⁰ Eemoghon Petrus ipesam pa tau muul.

Tinepneep ris, ghoru yes to tiyoon tigharau Petrus, anadi tisaav pani tighaze: “Onoon kat. Yom tonene, todi eez paam. Pasa, yom to Galilaia.”

⁷¹ Tovenen Petrus imundig, ve isaav ariana kat ighaze: “Onoon sambam, ngeu to yam asavsaav pani ne, you nawatagi rita maau kat. Ighaze natoom, Maaron tau pale iwaghamun ghou!”

⁷² Rikia moghon, tatareek itañ muul inim pae ru. Tovenen Petrus mata ingal Yesu aliña to ighaze: “Mboñ aazne, yom pale upesamun izag pae tol le isob, ghoru tatareek itañ muul inim pae ru.” Tovenen Petrus lolo isami pa tau, ve itañ tiina.

15

Tipayoon Yesu pa savsaveeñ ila Piladus mata (Mt 27:1-2,11-14; Lu 23:1-5; Yo 18:28-38)

¹ Mboñmaagh kat, yes daba to watoonrau toman ngara to tutuun, ve daba pida to lupuun tiina to tingin yes Yuda, tisob tilup di, ve tiwasavon di pa sa ngar to pale tigham pa Yesu. Le isob, ghoru tikis Yesu, tikau nima, ve tighami tila tighuri ila Piladus nima. ² Piladus ighason Yesu ighaze: “Vena, yom kinik to yes Yuda?”

Yesu ipamuul aliña ighaze: “Nanan taum saveeñ tiom.” *Yo 18:36-37.*

³ Ghoru yes daba to watoonrau timundig, ve tingal saveen naol pa Yesu. ⁴ Tovenen Piladus ighasoni muul ighaze: “Vena, yom irau upamuul saveen todi, ma maau? Ughita. Yes tingal saveen naol payom.” ⁵ Eemoghon Yesu isavia saveen eta muul maau. Neneenja moghon. Tovenen Piladus igham ngar naol. *Is 53:7*

Piladus iyok ighaze tirab Yesu izala ai pambaron

(Mt 27:15-26; Lu 23:13-25; Yo 18:39–19:16)

⁶ Ndaman to naol ne, lupuun tiina to Pasova ighaze ivot, Piladus ighamgham tovene: Yes to tineep ila ruum to yabyabuun lolo, ighaze ival tiina tighasoni pa ipul todi eta ivot, nene pale ipuli ivot. ⁷ Sawa tonenen, ngeu eez, iza Barabas, yesna ndiran pida paam tineep ila ruum to yabyabuun lolo. Pasa, sawa to ival tiina tipamundigin malmal pa tizurun gavman to Rom, Barabas toman ndita tonowen tirab tamtoghon pida timaat.

⁸ Tovenen ival tiina tila to Piladus, ve tighasoni tighaze ipul tamtoghon todi eta ivot itaghon ngar to moghon moghon ighamghami. ⁹ Piladus ipamuul alinadi ighaze: “Vena? Yam aghaze you napul kinik to yam Yuda ilat payam?” ¹⁰ Piladus isaav tovene pasa, ye iwatag: Daba to yes Yuda tigham Yesu inim, ve tighuri ila nima pasa, tighita tamtoghon katindi tipait Yesu pa uraat toni ve titaghooni. Tauto ireu yes daba tonowen lolodi, ve tighur koi pani.

¹¹ Eemoghon yes daba to watoonrau tipazaagh ival tiina, leso tiyok pa Piladus alinaja sob, ve tigha-

soni pa ipul Barabas ivot ila.

Mbanj

3:13+

¹² Tovenen Piladus ighason di muul: “Ighaze vennen, pale naghām vena pa ŋgeu to yam awaata aghaze ye kinik to yam Yuda?”

¹³ Yes timboob muul toman aliŋadi tiina tighaze: “Urabi izala ai pambarooŋ!”

¹⁴ Tovenen Piladus ighason di muul ighaze: “Pasa? Ye igham sa sosor?”

Eemoghon azedi iyaryaan pa bobaan tighaze: “Urabi izala ai pambarooŋ!”

¹⁵ Piladus ighaze igham ival tiina tonowen lolodi poia. Tovenen ilooŋ aliŋadi, ve ipul Barabas ivot ila todi. Ve isaav ve tilos Yesu.*
Ghoro ighuri ila ndaaba toni pida nimadi. Leso tighami tila, ve tirabi izala ai pambarooŋ.

Yes ndaaba tipamogheran Yesu

(Mt 27:27-31; Yo 19:2-3)

¹⁶ Yes ndaaba tonowen tigham Yesu tilooŋ tila gavana ruum toni lolo, ghoro tipoi nditadi tisob tinim tilup di, ve tipamogheran Yesu inimale ye kinik. ¹⁷⁻¹⁸ Tigham uli eez to bodeeŋa inimale aindan, ve tipiyaava izala Yesu avara. Ve tigham waar mata mata ve titalia, ve tighuri izala Yesu daba inimale moghar ndamooda. Ghoro tisaav pani tighaze: “Iya, aa kinik to yes Yuda, yei nipait ghom!” ¹⁹ Ve tigham toon ve tiloslos daba pani, tivuragi, ve tiput aghedi pani inimale tipakuri. ²⁰ Tipamogherani le isob, ghoro tiduduum uli to bodeeŋa inimale aindan izi pani, ve tindudi pa tau

* **15:15:** Ravraav to Roma tiloslos tamtoghon pani, poia maau. Timbit mbef matadi ila, lesu iwaghamun tamtoghon kat.

uli toni muul, ve tighami tila, leso tirabi izala ai pambaroon.

Tirab Yesu izala ai pambaroon

(Mt 27:32-44; Lu 23:26-43; Yo 19:17-27)

²¹⁻²² Yes tipul ndug tiina Yerusalem, ve tilaagh taghon ataam tila, le tivot to ngeu eez to ndug Sairini, iza Simon. Ye Aleksander ve Rupus tamandi. Ye ineep Yerusalem dige, ve ighaze iloon ila pa ndug tiina. Yes ndaaba tighita, ve tisasaara inim, ve tighur ai pambaroon to Yesu izala avara, ve ana imbaada, ve tila tivot ndug eez, iza ‘Golgata.’ (‘Golgata’ pughu tovene: Ndog to ghitoonja inimale tamtoghon daba rubruuba.)

²³ Ndaaba tighaze tigham Yesu a vaen to titoora toman marasin, leso iuuli pa yabyabuun toni. Eemoghon ye lolo pa ighuni maau. ²⁴ Yes tirabi izala ai pambaroon, ghoru tigham Yesu nonogiinja toni toman mbeb toni pida, ve tighaze tireii irau di. Tovenen tigham mogheraan eez, leso tighita sei to pale igham sa mbeb. *Mbo 22:18*

²⁵ Sawa to tirab Yesu izala ai pambaroon, ndag anunu igham liim ve paan. ²⁶ Timbood paesiinj to mateenj toni pughu izala ai pambaroon toni daba. Paesiinj tonowen isaav tovene: ‘Kinik to yes Yuda.’

²⁷⁻²⁸ Sawa to tirab Yesu izala ai pambaroon, tirab tamtoghon ru paam. Eez, tipayoonda imonau ila pa Yesu nima waan, ve ite ila pa nima njas. Yesuru ndiran to didiaan ve ghamuun malmal.† *Is 53:12*

† **15:27-28:** Yes Roma tirab tamtoghon ila ai pambaroon pa sosor sorok maau. Yes to samsamiadi kat, ve yes to tigham malmal pa tizurun gavman to Rom tighau, yes moghon to Roma tirab di ila ai pambaroon.

²⁹ Sawa to Yesu imonau ila ai pambaroon, ival tiina tilala tinimnim. Matadi izaza pani, ve dabadi katia pani inimale velegiiji, ve tisasavia saveen velegiija pani tighaze: “Aa, ughita wa! Yom to ughaze ureu Rumai Tiina izi, ve mboŋ inim tol, ghoru upayoonda muul. ³⁰ Poia. Uul taum ve uzi pa ai pambaroon tiom tonanan!” *Mbo 22:7, 109:25; Yo 2:19*

³¹ Yes daba to watoonrau toman ngara to tutuun tivelegi paam. Tiwasavon di tighaze: “Ye iuluul tamtoghon naol, eemoghon irau iuul tau maau. ³² Ye ighaze ye Mesia ve kinik to iit Israela. Poia. Taneep ve taghita. Ighaze ipul ai pambaroon toni ve izi inim taan, ghoru taghur ila toni!” Ndiran ru to tirab di tizala ai pambaroon igharau Yesu, yesuru paam tisavia saveen velegiij naol pani.

Yesu imaat

(Mt 27:45-56; Lu 23:44-49; Yo 19:28-30)

³³ Ndag anunu iza inim bobodaan, ghoru ndo-room tiina ivot irau taan isob, ve inepneep tovene le ndag ivool (3 kilok). ³⁴ Ghoru Yesu imboob aliija tiina ighaze: “Eloi, Eloi lema sabaktani!” Saveen tonene, pughu tovene:

‘Maaron tiou, Maaron tiou! Pughu vena to upul murim payou?’ *Mbo 22:1*

³⁵ Tamtoghon pida to tiyondyood tigharau Yesu, tiloon sapirin saveen tonene, ve tisaav tighaze: “Aloon! Ipoi propet Ilia.”[†] ³⁶ Tovenen tamtoghon todi eez ilaan ila igham momosan, ve izeeva izila

[†] **15:35:** Yes Israela tiwaat propet Ilia iza tighaze ‘Eliyahu.’ Tauto sawa to Yesu ipoi Maaron ighaze: “Eloi, Eloi,” tamtoghon tighaze pa ye ipoi Ilia.

uur eez to vaen ineep ila. Ghoro ikau i la ai mala, ve izuzuuna izala pa Yesu, leso iyavoona. Ve isaav ighaze: “Aneep ve taghita. Pale Ila inim iuuli ve ighami izi, ma maau?” *Mbo 69:21*

³⁷ Ghoro Yesu imboob muul toman aliņa tiina, ve iyavan ve imaat.

³⁸ Sawa kat tonenen, uli tiina to imonau ila Rumai Tiina lolo ve iponpoon ndug to patabuan kat ne, imarepreep to sala we, ve malmali izila sila, le inim ru. *Igham 40:21; Hib 6:19+, 10:19+*

³⁹ Daba to yes ndaaba iyondyood ila Yesu nagho, ve ighita Yesu imaat. Ye ighita mateen toni, ite kat. Tovenen isaav ighaze: “Onoon kat, ngeu tonene, ye Maaron Natu.” *Mk 1:24*

⁴⁰ Ndiliva pida tiyondyood sagan, ve timarar mbep to ivotvot pa Yesu. Ndiliva tonowen, tol to tiyoon toman di, nene Maria to ndug Magdala, ve Maria ite to Yosep yesuru Yakobus kainanen tinandi, ve Salome. ⁴¹ Sawa to Yesu ighamgham uraat izi Galilaia, ndiliva tonenen titaghoni ve timbesmbees pani. Ve ndiliva naol to yesņa Yesu tilaagh tila pa Yerusalem, yes paam tineep toman di.

Tighur Yesu paatu ila naal lolo

(Mt 27:57-61; Lu 23:50-56; Yo 19:38-42)

⁴² Sawa tonenen, nene sawa to titar taudi pa umbom patabuan to ighaze ivot. ⁴³ Ve rabrab izi wa. Tovenen ngeu eez to ndug Arimatea, iza Yosep, ipariaan tau, ve ila to Piladus, ve ighasoni ighaze iyokia Yesu paatu pani. Yosep, ye ngeu eez to ival tiina titandag pani, ve tipapait iza. Ye ineep ila lupuun tiina to yes daba to tinģin yes Israela. Ve

ighurghur mata pa sawa to pale Maaron ipatoon pooz toni ivot ighazoonj.

⁴⁴ Sawa to Yosep ipaes pa Piladus ighaze Yesu imaat wa, Piladus igham ngar naol ighaze: “Yesu imaat onoon, ma maau?” Tovenen ipoi daba to yes ndaaba to tirab Yesu izala ai pambaroonj ne inim, ve ighasoni ighaze: “Yesu imaat kusia wa, ma sone?” ⁴⁵ Daba tonowen ipaes pani ighaze Yesu imaat wa. Tovenen Piladus iyokia Yesu paatu pa Yosep.

⁴⁶ Yosep ighol uli pisosoonja eez, ve ighami ila. Ve yesna ndiran pida tizugua Yesu paatu izi pa ai pambaroonj, ve tikau pa uli tonowen. Ghoru tighami tila, ve tighuri iloonj ila yaam saambu eez to tigharaata pataghaanj inim naal pa mateenja. Ve tipatambulin yaam tiina eez ila ipoon naal avo. ⁴⁷ Maria to Magdala yesuru Maria ite to Yose tina ne tineep toman di paam. Tovenen yesuru tila tighita ndug to tighur Yesu paatu pani.

16

Yesu imundig pa mateenj (Mt 28:1-8; Lu 24:1-12; Yo 20:1-10)

¹ Umbom patabuanj isob, ghoru Maria to Magdala yesuru Maria ite to Yakobus tina, ve Salome, yes tol tila tighol naunaunj toman ngoreenj to vuzi poia ne tighaze tighami tila, ve tilinj izala Yesu paatu. ² Tovenen ndag to imuunj pa wik tonen, mbonjmaagh to ndag ghara iza, ve yes tol timundig ve tila pa naal to Yesu. ³ Tilaghlaagh tila, ve tiwasavon di tighaze: “Sei pale iuul ghiit, ve ipatambulin yaam tiina ighau pa naal avo?” ⁴ Tila

tivot, ve matadi ila le tighita yaam tiina to ipoon naal avo, ineep ila ina muul maau. Tipatambulini ighau ila pa dige wa. ⁵ Tovenen ndiliva tonowen tiloon tila naal lolo, le tighita ngeu paghu eez mbole izi dige ila pa nimadi waan. Ye indudi pa nonogiina pisosona. Yes tighita, le runadi iza ve ngar todi isob.

⁶ Ngeu tonowen isaav padi ighaze: “Yam agham ngar naol malep. You nawatag: Yam anim aghaze aghita Yesu to Nasaret to tirabi izala ai pambaroon ne paatu. Eemoghon ye ineep sualen muul maau. Maaron ipamundigini pa mateen wa! Aghita ina to tighur paatu ighen ila. ⁷ Aloon. Yam ala ve apaesia mbeb tonene varu pa taghoniina toni. Ve matamim ingal Petrus, ve apaes pani paam. Asaav padi aghaze: Yesu pale imuun ila Galilaia. Ataghoni ala, ghoru aghita izi tonowe itaghon saveen to muun ye isavia payam.”

⁸ Ye isavsaav padi le isob, ghoru ndiliva tonen tipul naal, ve tivot tila pumuri, ve tighau tila toman matughezaan tiina. Pasa, mbeb to ivot padi, nene igham di runadi iza le ngar todi isob. Tovenen tisavia mbeb tonenen varu pa

tamtoghon eta maau.*

Maria to Magdala ighita Yesu
(Mt 28:9-10; Yo 20:11-18)

⁹ Ndag to ivot muuᅇ pa wik tonenen (Sande), mboᅇmaagh kat, ve Yesu imundig pa mateeᅇ. Ghoru ila ivot to Maria to Magdala muuᅇ. Ye liva to muuᅇ Yesu indiir avuvu samsamiadi liim ve ru tighau pani. *Lu 8:2*

¹⁰ Maria ighita le isob, ghoru ila ipaes pa yes to muuᅇ tilaghaagh toman Yesu. Pasa, yes tineep toman lolodi ipataᅇaᅇ ve titaᅇaᅇaᅇ pani sone. ¹¹ Ye isaav padi ighaze: “Yesu, imundig pa mateeᅇ, ve ineep mata iyaryaar. You naghita pa taug matag kat.” Eemoghon yes tighur ila saveeᅇ toni maau.

Taghoniᅇa ru tighita Yesu izi ataam luvuᅇa
(Lu 24:13-35)

¹² Muri ghoru, taghoniᅇa ru to Yesu tipul ndug tiina Yerusalem, ve tilaagh taghon ataam tila, ve Yesu ivot todi. Eemoghon tighilaala rikia maau. Pasa, nagho itoora ite ris. ¹³ Sawa to tighilaala,

* **16:8:** Ndiran ᅇgara katindi tighaze saveeᅇ to Markus imbooda, inim imuul waaro 8 moghon. Eemoghon muri, tiseeᅇ varu poia to Markus pa saveeᅇ pida itaghon varu poia to Matayu ve Lukas. Saveeᅇ tonowen to aazne ineep ila waaro 9 ila imuul waaro 20. Ve buk munginadi pida, saveeᅇ waaro ite ipasob varu poia to Markus. Saveeᅇ tovone: “Ndiliva tonenen timuul tila, ve tipaesia saveeᅇ isob to aᅇla isavia padi ne pa Petrus toman yes to tineep tomani. Muri ghoru, Yesu imbaaᅇ taghoniᅇa toni tila pa tivotia saveeᅇ patabuaᅇ to Maaron irau ndug tisob. Yes to tineep ila pa ndag iza, ve yes to tineep ila pa ndag izila ne paam. Leso tiwatag ataam to Maaron igham mulin di, ve tineep matadi iyaryaar le alok. Saveeᅇ toni tonenen irau isob ne maau. Ineeᅇ le alok.”

timuul tila ve tipaesia mbeb tonenen varu pa taghoniinja toni pida. Eemoghon saveeņ todi paam, nditadi tighur ila maau.

Yesu ivot to taghoniinja toni
(Yo 20:26-31)

¹⁴ Muri ghoru, taghoniinja toni saangul ve eez (11) tilup di pa ghanghaniņ ve tinepneep. Mala maau ve Yesu tau ivot todi, ve iyaan di. Pasa, ye imundig pa mateeņ, ve tamtoghon pida tighita ve tisavia varu padi wa. Eemoghon ņgar todi iyaryaañ, ve tighur ila maau. *1Kor 15:5+*

Yesu ighur uraat pa taghoniinja toni
(Mt 28:18-20; Lu 24:44-49; Mbaņ 1:6-8)

¹⁵ Ve Yesu isaav padi ighaze: “Ala irau ndug tisob, ve avotia varu poia pa tamtoghon tisob to taan. *Mt 28:19; Mbaņ 1:8; Kol 1:23*

¹⁶ Ighaze tamtoghon eta ighur inim tiou ve igham ya, nene pale Maaron igham mulini ve ineeep pooi. Eemoghon yes to tighur ila maau, nene pale Maaron ighur atia padi ve tilaledi. *Yo 3:18,36; Mbaņ 2:38; Ro 10:9*

¹⁷ Yes to tighur inim tiou, nene pale naghām ledi tapiridi to tigham mbeb gharatoonjadi tivot tinim ghilaloon pa tamtoghon, leso tighur inim tiou. Mbeb tovene: Pale tindiir avuvu samsamiadi tighau pa tamtoghon ila you izag, ve tisavsav ila ndug ndug aliņadi to tiwatagi maau. *Mbaņ 2:6+, 5:16, 8:7, 10:46; 1Kor 12:9+,28*

¹⁸ Ve ighaze tikis moot samia eta, ma tighun mbeb lili eta, nene pale iwaghāmun di maau. Ve ighaze tighur nimadi izala moroghoonja poghodi, ve tighason Maaron pa iuul di, ye pale igham di tinidi

popoia muul.” *Lu 10:19; Mban̄ 3:7+, 28:3+; Yems 5:14+*

Yesu izala pa sambam

(Lu 24:50-53; Mban̄ 1:9-11)

¹⁹ Tiina toit Yesu isavsaav pa taghoniina toni le isob, ghoru Tama Maaron ighami imuul iza ila pa sambam, ve mbole izi ila ye nima waan. *Mbo 110:1; Mban̄ 2:33+, 7:55; Ro 8:34; Hib 1:3*

²⁰ Ghoru taghoniina toni tila tivotia varu poia irau ndug tisob. Ve Tiina toit ineep toman di pa uraat todi, ve igham mbeb gharatoonadi pida tivot ila nimadi. Tauto ipariaan saveen todi, ve tamtoghon tighur ila tighaze saveen tonenen, nene saveen onoon. *Mban̄ 4:29, 14:3; Hib 2:3*

Maaron Saveen Toni Patabuan
The New Testament and portions of the Old Testament
in the Oov Dialect of the Saveeng language of Papua
New Guinea. The Saveeng language is also called Mutu
or Mutu-Tuam.

Sampela hap Buk Baibel long tokples Saveeng Oov
long Niugini

copyright © 2011 Wycliffe Bible Translators, Inc.

Language: Saveeng (Mutu)

Dialect: Oov

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

PDF generated using Haiola and XeLaTeX on 11 Nov 2022 from source files dated 9 Oct 2020

c7a45d99-91a2-564f-9c55-d2efc8be7fae